



## TAPAK 9

J&K nung Angh yimsüsüba  
benoktsüla: Farooq



## TAPAK 10

Hillary Clinton anema  
benokba ken o magizüker

VOL. XIV NO. 220 (ADOK 220)

DIMAPUR

MONDAY

MAY 29, 2017

5.00

## ACAUT Nagaland-i Lokayukta mapa küma tenzüksü mepishir

**Dimapur, May 28 (TYO):** Chief Minister Dr. Shurhuzolie Liezutsu-i jaokba ama May 26, 2017 nü ACAUT Nagaland consultative member Niketu Iralu den ACAUT teloki pa den ajurutep aser State legislative assembly indang Monsoon session nung Lokayukta Bill mapa küma tenzüksü atema shidi ka agütsü, ta Media Cell sangdong ka nung metetdaksü.

"Lokayukta Bill atema standing committee indang mapangji ita trok atema lir aser iba nung ita trok apuloktsütsü akok. Committee nem mapang lemzüksüba süiadoker lia Chief Minister Dr. Shurhuzolie-i standing committee nem ita trok agütsüsemogo, anungji July 2017 nung committee-i report agütsütsüla" ta ACAUT-i sangdong nung shia lir.

## CBSE Class 12 results sangdongogo Raksha Gopal-i mezüngbuba jenjang angu

**New Delhi, May 28 (Agencies):** Central Board of Secondary Education (CBSE)-i Deobarnü Senior Secondary Examination (Class 12) indang tatidang result sangdongogo. Noida nung aliba Amity International School nungi Raksha Gopal-i 99.6% nguteta mezüngbuba jenjang takok angu.

agütsü aser parnok rongnung shilem 82-i takok nguogo.

CBSE Class 12 tatidang atema school 10,678 nungi kaketshir ajak agi 10,98,891 liasü. Kaketshirtem rongnung tebur 6,38,865 aser tetsür 4,60,026 liasü.

CBSE indang Marks Moderation Policy atema ashishitep ken o ka adokba agi result menur ang sangdongogo. K a k e t s h i r t e m i c b s e r e s u l t s . n i c . i n . n u n g r e s u l t t e j a n g j a a n g u t s ü .

Union HRD Minister Prakash Javadekar-i stream asem- Science, Commerce aser Humanities nungi tematiba jenjang takok angurtem den jembi.

Taküm kaketshir lakh 11 shi kati CBSE Class 12 tatidang

(Maneni tapak 11 nung...)

## DG-i Kohima Lions Club semdang

**Dimapur, May 28:** Deobarnü Lion Roman Bordoloi-i Lions Club of Kohima (LCK) semdang. Pa ya Lions Club International of District 322D indang District Governor lir.

ama lir aser 2040 tashi nungbo nisung million 642 den teimba dak atongtsü. Anungji, züngsemtemi iba awareness campaign nung shilem agitsüla, ta paisa ayongzük.

Pai LCK semdangba tenüng nung tanü Ura Hotel indang Conference Hall nung sentong ka ayongzüka agi.

Lion Bordoloi-isa Lions Club of Kohima (LCK) dang Club nung züngsem tasentem anioktsü atema ayongzük.

Sentong nung Lion Roman Bordoloi-i o jembidang, pai Kohima semdangba atema pelaba ashiba den Lions Club International-i meimchir atema mapatong balala inyakba indang osang metetdaksü.

LCK President Lion Tali Jamir-i District Governor pela agizüka o jembidang, Club-i inyaka aruba osangtem metetdaksü aser sangküm Lionistic Year - 2017-18 nung mapatong tasentem inyaksü ta ashi.

Lions Club International-i tenzükba "Diabetes Awareness" project indang ashidang Lion Bordoloi-i, "World Health Organization-i alima nung nisung million 420 tema dak diabetes keta lir ta asadangtetba atema Lions Club International-i Diabetes Awareness indang maparentenzük" ta ashi.

LCK Treasurer, Lion Talitemsu Jamir-ia District Governor dang club indang senotsü osang metetdaksü aser Lion Aroba, mezüng Vice President-i anküp tepela o jembi.

Iba ya alima nung wara ka

Iba sentong nung Club züngsemtem den Lion Lalita R Khadaria, Secretary, Dimapur Blue Vanda-a aden.

## 'Mann Ki Baat' ajanga kibong shia nung ni züngsem ama kümogo: PM

**New Delhi, May 28 (Agencies):** Ita shia Ato kilonser, Narendra Modi-i radio ajanga linük nüburtem den jembiba sentong dak sendakba nung tanü pai, küm ana tejaklen iba sentong tenzük, aser iba sentong ya ajanga linük nung kibong shia nung pa kibong züngsem ka amai kümogo, ta ashi.

Tanü 'Mann Ki Baat' sentong ajanga jembidang Modi-i, "Nisung kari 'Mann Ki Baat' ya onük ka ama agir aser karibo yimtenren tsütsü nungi aitsür," ta ashi.

Opposition party temi, Modi-i iba sentong ajanga pai

inyaknüba dang jembir, saka nüburtem taginüba olabo mangar, ta aitsüba dak sendakba nung pai iba o ya jembi.

'Mann Ki Baat' sentong ya 2014 October ita nung tenzüka liasü. "Iba sentong ya ajanga ni kidang mener kibong züngsemtem den jembir ama ni bilemer," ta Ato kilonserisa ashi.

Minute 30 sentong nungsa pai nüburtem dang alima kümzüka ayutsü aser merükmejua alitsü ayongzükba den külemi yoga indang aser nüjiso atema rarartem indanga jembia liasü.

"Tajunglen agi aitsüba ajanga

asen democracy tashi itshidaksür. Nüburtemi onok mapa junga asadanger ta meteta ni pelar. Sorkari nüburtem nem telangzüba agütsüttsüla. Ni ibaji pelaa agizker," ta paisa ashi.

Muslim nunger den Ramzan salem lemsatepdang pai, linüki nüma atangtsüla, kechiyong India nung tamangba lokti ajak tesünep nung liteter, ta ashi.

"India nunger sobaliba balala aser lokti balala külemi litetbaji asen tashi lir; alima nung tamangba yimsü balala nungi India nunger crore 125-i tesünep aser telongjem osang prokba atema nüma atanger," ta paisa shisem.

## Dr. Jitendra Singh-i NE Organic Showroom-cum-Restaurant semdang



May 28, 2017 nü New Delhi nung aliba Dilli Haat Dr. Jitendra Singh North East Organic Showroom-cum-Restaurant semdangdang agiba noksa angur.

semdangdang iba olen jembi.

Iba sentong ya Ministry of DoNER kübok NERAMACL ajanga "ONE" (Organic North East) omen nung ajemdaker ayongzüker. Iba sentong nung DoNER aser Ministry of Agriculture & Farmers Welfare, Govt. of India naprongi teyari agütsür.

"North-Eastern Region nung mozü mamshii tsünütetbatem indang linük nung nisung ajakibo memetet aser kodang parnoki iba ya meteta kümdir parnoki bushiyonga arutsü. Ibaji ajanga NER nung shishilembaba jenjang ajungketba dang masü saka aluyimertem senotsü tsütsü ajangzüksü" ta Union Minister-isa ashi.

North East kübok tesem aika nung shishilembadak tajung mali aser ibaji atema NERAMAC-i mapa inyaksüla. NER nung tsünütetba noklang nung shilem 80-82 shi ka mozü mamshii dang tsünüteter aser ibaji takok ngua shishilembatsüla, ta Dr. Jitendra-isa ayongzük.

(Maneni tapak 11 nung...)

**New Delhi, May 28 (Agencies):** North Eastern Regional Agricultural Marketing Corporation Limited (NERAMACL)-i North East Region nung tsünüsenbongtsütem ajungkettsü atema teti mapa inyaka arur aser iba telok ajanga NER nung aluyimertem aser agri-preneurs renloktsü atema tongti shilem

agir, ta Union Minister, Dr. Jitendra Singh-i ashi.

Deobarnü Union Minister of State (Independent Charge) for Development of North Eastern Region (DoNER), MoS PMO, Personnel, Public Grievances, Pensions, Atomic Energy & Space, Dr. Jitendra Singh-i Dilli Haat nung North East Organic Showroom-cum-Restaurant

## Chiyungba yimya shingai melenshitsütsü makok: Kerala CM

**Kannur/Alappuzha (Kerala) May 28 (Agencies):** Deobarnü Kerala sorkari, Centre-i nashi tepsettsü nokdangba anema state sorkari ozüng ka benoktsü, ta metetdaksü.

Tanü Alapuzha nung sentong ka nung jembidang Kerala Chief Minister, Pinarayi Vijayan-i, "Kerala nungeri sobaliba chiyungtsütem chia arur, aser itemji temang den tapet, aser ibaji shingai melenshitsütsü makok," ta ashi. "Nüburtemi pei chinüba

chiyungtsü achitsü atema state sorkari nungdakba ajak inyaksü. Kerala nungeri chiyungtsü achitsü atema New Delhi nung mesüra Nagpur (RSS headquarters alidak) nungi shinga danga angazüksü menüngdak," ta Vijayan-i ashi.

Yashi Centre sorkar telemtetba anema Vijayan-i Ato kilonser, Narendra Modi dangi shidi ka zülua liasü, aser tanü pai iba atema BJP-i aniba Centre sorkar aser RSS aitsüogo.

Local Administration Minister, K T Jaleel-i, Centre

sorkar telemtetba agiena, state sorkari ozüng tasen ka benoktsü, ta metetdaksü.

Ano külen state nung opposition Congress-i aniba UDF-i Centre telemtetba anema asüng 'black day' amungtsü lemtetogo.

Iba onük nung o toktepbapang ka nung tanü police-i Youth Congress nung inyaker, Rijil Makulti den kari Kannur nung 'Beef fest' alidang yimjak nung nashi ka tepsetba atema parnok anema ken o benokogo.

(Maneni tapak 11 nung...)

# MSTM-i takok angur kaketshirtem tushi DUCCF senden ayonger



**Mokokchung, May 28 (TYO):** Mopungchuket Senso Telungjem Mokokchung (MSTM) ajanga Mopungchuket nung Mokokchung town nung alir shisaluyimer anati HSSLCE 2017 nung tematiba jenjang ajangzukteta takok anguba asoshi tetushi agütsüba sentong ka tanü agiogo. MSTM-i ayonga Mopungchuket Baptist Arogo tenzüikba bilemtetba sentong aser MSTM Academic Excellence Award sentong tanü

Ongpangkong Salang Arkong Ward nung reptepa agia mungogo.

Bendangwapang Ozüküm aser Yangermongla na jabaso Sangpang. Noktichung B. Ozüküm-i HSSLCE 2017 (Science) nung Top 10 jenjang alangzukteta liasü. Pai St. John HSS Dimapur nungi iba tatidang agütsü aser marks 86.80% jenjang ngutet. Pai Mathematics nung marks 82 aser Science nung marks 93 ngua liasü. Pai Astrophysicist akümtsü

tejangraba lir.

Tanabuba nung, Imkongwapang Jamir aser Rongsensungla na jabaso Sangpang. Yaden Jamir-ia QMHSS Mokokchung nungi kasa HSSLCE 2017 (Science) tatidang nung marks 81.40% nguteta 1st Division nung takok anguba den külemi Ao Subject nung marks tímiba (90) nguteta liasü.

Pai MBBS aziungtsü jangrar. Takok angur kaketshirtem nem kulizüing kaket den senpet agüja liasü.

**Dimapur, May 28 (TYO):** tongtibang onüktem nung o Dimapur Urban Council Chairmen Federation (DUCCF)-i May 30 nikongdang 4:00 ako nungi Forest colony council hall nung rongdak lokti senden ka ayongzüker, anungji lemteptsü ali nungji Urban area kübok Chairman aser Secretary ajak iba senden nung medema adentsü metetdaksür, ta tanü DUCCF-i sangdong ka nung metetdaksü.

## Naga Students' Union, Pune sangdong

**Dimapur, May 28 (TYO):** Tanü Naga Students' Union, Pune-i sangdong ka ajanga, Pune nung aziungtsü sentong alir Naga nungertemi admission agitsü mesüra tanga teyari balala atema Union den tongtepratepdaksüner, ta metetdaksü.

**Tongteprateptsü atema:** Naga Students' Union, Pune Tir: Wemese Khalo-8805066582  
General Secretary: Toshikala Longkumer-7066881178  
Admission Committee Convenor: Rongsenshilu Jamir-9146966373

## 3 AR-i NSCN (K) züingsem ka apu



**Kohima, May 28 (TYO):** Osang ka lazükba sülen HQ IGAR (North) kübok 3 Assam Rifles sepaitemi May 25, 2017 nü Kohima nung South Point Market anasa BOC nung NSCN(K) nungi Raja Peyu, Imti Ao apu, ta tanü Assam Rifles-i sangdong ka nung metetdaksü.

Pua alisangi State sorkar department balala aser tang

teyangludak NH-29 (Kohima-Dimapur) four laning indang contractor tem dang nungi sen ahangba nung shilem agiba nangzükogo, ta Assam Rifles sangdong nungsa shia lir.

Maneni bushisingdangtsü atema pa den pa ket nungi apubatemji May 26, 2017 nü OC, South Police Station, Kohima ket nung agütsüogo, ta sangdong nungsa shia lir.

## Nashi tepsetba nokdangba ajanga NE bo mekongshitsü südi

**Imphal, May 28 (Agencies):** Taoba Hokolbarnü Centre sorkari nashi tepsetba dak sendakba ozüingtem agi Northeast state tembo mekongshitsü mesüra kangabo mekongshitsü südi, ta NE tesem nung aliba nüburtemi bilemer.

Centre nung aliba BJP-i aniba NDA sorkari nashi, jang aser ut densema shirurutem tepsettsü atema shiruru ayokba markets nungi shiruru alizükba anema ozüingtem sangdongogo.

Item ozüing dak sendakba nung advocate aser taoba mapang Manipur nung Additional Director General of Police, A. Romenkumar-i, nashi aser jang tepsettsü nokdangba anema nokdakertemi linük Temzüing kübok Arrla 21 nung

chiyungtsü temeten agüja aliba onük nung ajemdaker raratetsü, ta ashi.

"Ajisüaka taküm alitsü atema temeten indanga temzüing nung shia lir," ta paisa ashi.

2014 küm ken o ka nung Supreme Court-i, linük temzüing kübok Arrla 21 nung shia aliba 'taküm' tetezü nungji taküm aliba shiruru ajak densema lir, ta obendang agüja liasü.

Taoba mapang minister aser 2016 küm March ita assembly election nung BJP ticket nungi tamakok angusang, Nimaichand Luwang-i, "Nokdangba ozüingji shi achirtem- Khristantem, Muslim tem aser tangartem aliba state, Manipur nungbo kodanga mebenoktetsü. State nung Vaishnavite Hindu nung

nütsüingji ishika dang lir. Iba telemtetba ajanga BJP-i takoksa angutsü," ta ashi.

Churachandpur district nung nashi tepseta shi ayoker ka tenüing agi, L Haokip-i, "Ozü otsüla-oboula nungertem shikaritem liasü aser onoki benjung balala ajak nung nashi aser jang tepseta shi ayoker. Item ozüing tasentemji mangateter," ta ashi.

Manipur nung tribal markets ajak nung nashishi aser mesü shi densema tanga shi balala ayoker, iba nungji tangalen nungi tsüingkümapang balala nung aruba ozütem dena lir. Arem shiruru tapu balala ajak shi ayoker. Iba denji kasa Mizoram, Meghalaya aser Nagaland state tem nunga shi ayoker.

## KDLSA-i legal awareness aser 'quiz' tetoktepba ayonga agi



**Noksa nung team den Sunday school tanurtem angur.**

**Kiphire, May 28 (TYO):** Tanurtem nem legal aser tanurtem temeten metetdaksütsü nükjidong nung May 28, 2017 nü Kiphire nung Kiphire District Legal Services Authority (KDLSA)-i legal awareness den Protection of Children from Sexual Offence (POCSO) Act, 2012 indang 'quiz' tetoktepba Sangtam

Baptist Church Sunday school tanurtem atema katsüogo.

POCSO Act indang jembidang Panel Lawyer KDLSA, Hotingkiu Sangtam-i tanurtem kümzüka ayutsü atema benokba Acts balala indang tanurtem nem rajema lidaktsütsü nüngdak, koba ajanga tanurtem tarutsü tia junga yangertetsü, ta metetdaksü.

Paisa, POCSO Act ya aziabong tsütsü ozüing alema arishi küm 18 tekübok tanurtem anema inyakba nungi kümzüksü atema lir, ta ashi.

Sentong nungsa quiz tetoktepba nung tanur 100-i shilem agi aser mezüingbuba jenjang asem nung takok angurtemji- Alina, Atsala aser Tesila nung liasü.

## Ditso Mero Memorial Excellence Award agütsü



**Kohima, May 28 (TYO):** aser par asemprongla nem HSLC tatidang nung top 20 senpet 10,000 den citation agütsüogo.

Chakhesang kaketshirtem CBCK Senior Pastor, Rev. Khrotso Mero-i par asem Excellence Award agüja liasü.

Tanü Baptist Church Kohima (CBCK) nung iba Award angurtemji, Greenwood School Dimapur nungi Ravelii Nienu (Top 7), Northfield, Khikha nungi Seso Koza (Top 18) aser Chandmari Higher Secondary School Kohima nungi Pungolu Kezo, (Top 20) nung liasü,

Sentong nungsa Chakhesang Baptist Church Council (CBCC) Executive Secretary, Rev. Dr. Vezopa Tetseo-i par asem nem sarasademja liasü.





Kohima, May 28: District Governor of Lions Club International of District 322D, Lion Roman Bordoloi-i Deobarnü Kohima semdangba mapang Lions Club züngsemtem den külemi tangokba noksa nung angur.

## Kamtapur Liberation Organisation telungpur asem apu

**Agartala, May 28 (Agencies):** Assam nungi Kamtapur Liberation Organisation (KLO) telungpur asem Tripura kübok Gandhachera subdivision nung puogo. Parnok asem ya Bangladesh nungi India-i aiter lia apu.

Parnok asem ya Assam police nem agütsüogo, kechiyong pa asem ya keno tanga atema par state-i nüngdaka liasü, ta police ketdangser kati ashi.

"Goutam Roy, Padma Deka aser Manashjyoti Deka nunger Tripura State Rifles (TSR) temi meita aoba mapang nung puogo. Parnok asem Raishyabari Police Station OC (officer in-charge) ket nung agütsü. Par asem dang

asüngdangyaba mapang parnok ya KLO nung züngsem lir ta meteta aru," ta Sub-divisional Police Officer (SDPO) Gandacherra, Jawharlal Debbarma-i osangbenertem dang ashi.

Bangladesh kübok Chittagong Hill Tracts nung Kamtapur Liberation Organization (KLO) camp nung training agir India-i meyipa aruba mapang telungpur asem ya apu.

Udalguri nung Kaliagaon ken o dak sendakba nung telungpurtem ya Assam police-i bushia liasü. Tripura police-i Assam police nem osang agütsüba sülen Udalguri Chief Judicial Magistrate (CJM) kübok obendangtsü asoshi

parnok asem ya parnoki anir ao.

"Parnok asem ya Raishyabari arrtsü len Bangladesh nungi India-i aitba dak sendakba nung aija okadak agütsü. Parnok asem anogo asem tashi soita ayuba sülen Kalaigaon ken o dak sendakba nung Udalguri district police-i bushir ta ngutet. Iba sülen Assam police iba okadaki aru aser parnok aputsüba kuli kakat sayur anir ao," ta Assistant Public Prosecutor, Mintu Sinha-i ashi.

Iba tatalokba ajanga northeast nung telungpurtemi parnok Bangladesh-i aitsü asoshi Tripura ajanga senzüba tali jangjaogo. Tripura aser Bangladesh arrtsü ya kilometre 857 lir.

## Sukhoi-30 indang Black Box ngutetogo

**Tezpur, May 28 (Agencies):** Sukhoi-30 MKI fighter jet nung pilot ana mener samaba tayimtsü teraksa ya Arunachal Pradesh indang arem min nung nguteter anogu ananü buba nung iba tayimtsü indang 'black box' ngutetogo. Saka tayimtsü nung mena alisang nisung ana indang osang kicha monguteti lir.

"Ali nung iba tayimtsü bushir telok kati iba tayimtsü tsükokba tesem tonga otet. Iba tayimtsü indang 'black box' ngutetogo aser anu maneni bushitar," ta Air Force indang odongtar Wing Commander, Anupam Banerjee-i tanü Delhi nung-i ashi.

Iba tayimtsü ya training agitsü atema Tezpur Air Force station nungi Mongulbarnü (May 23) abusor mapang talangka melie sama aser tayimtsü teraksa ya Tezpur nung tayimtsü anendak nungi kilometre 60 orr arem min nung

Hokulbarnü ngutet.

Iba lendong adalokba bushisüngdangtsü asoshi Air Force ajanga totuyuba agütsüogo.

Iba Sukhoi-30 MKI fighter jet teraksa ya tayimtsü nungi bushirtemi ngutet aser tanü iba tesem tonga otetogo. Iba tesem ya arem min tulu aser tsüngsang kanga majungba ajanga mezüing aor teloki metongteti liasü.

Russia nung yangluba raradang amshiba tayimtsü mezüing batch ya IAF nung 1990 nung züingok. Iba sülen item tayimtsü ya 7 tashi tsükokogo.

Arunachal Pradesh nung aliba China aser India arrtsü anütsü asoshi SU-30 MKI tayimtsü ya Tezpur airbase-i 2009 June 15 nung yoka liasü.

Tang Tezpur nung tayimtsü 36 aliba squadron ana yoka lir.

## Manipur indang Rajya Sabha menden BJP-i angu

**Imphal, May 28 (Agencies):** Manipur nungi Rajya Sabha nung menden ka atema election agiba nung BJP-i takok anguba asoshi BJP Manipur unit tir, Khetrinmayum Bhabananda-i anir ketdangsertem den India Ato Kelonser, Narendra Modi-i tepela lemsatet.

"Rajya Sabha menden asoshi Manipur nungi BJP-i mezüing takok tetsüingta tulu agi koktetba asoshi ni kanga pelar. Manipur BJP aser Bhabananda dang pelar," ta Modi-i pa indang

Twitter nung zülütsü.

Manipur atema Rajya Sabha nung menden ka lir aser iba menden atema Brehostibarnü election agiba nung Bhabananda-i akok.

Manipur assembly nung menden 60 aliba nungi Bhabananda-i tetsüingta vote 18 agi pa den tokteper Congress telok nungi Elangbam Dijwamani madak takok angu. Rajya Sabha menden asoshi toktepba nung Bhabananda-i vote 39 aser Dijwamani-i vote 21 ngutet.

## Railway site nung oset raksatsüba jenjang ano masadang

**Tura, May 28 (Agencies):** Ri-Bhoi district kübok Byrnihat anasa Ronghona yimtsüing nung railway project site, yashi Khasi Students Union (KSU) North Khasi Hills züngsemtemi amakba dak sendakba nung teraksa adokba jenjang tang tashi police-i masadang lir.

"Yashi tatalokba dak sendakba nung oset raksaba ajanga takoksa aluba jenjang tang tashi masadang lir," ta Ri-Bhoi district SP, Ramesh Singh-i osangbenertem dang tanü telephone ajanga ashi.

KSU puri yashi amakba nung

VNR Rail Infrastructure Private Limited meyong earthmover 4, dumper 7 aser vibrator machine ka, ta raksatsüogo.

"Iba ken o dak sendaka aliba nisungtem aputsü asoshi ano mejangjai lir," ta Shing-i ashi.

Kasa mapang nung Laban aser Rynjah tesem nung yasüing mejangjaba nisungtemi petrol bomb pokloksü. Police temi ashiba agi, petrol bomb mezüingbubaji Laban nung Pine Mount School anasa aliba Social Welfare office nung aonung 9:00 ako shi nung pokloksü. Iba sülen aonung

10:40 shi nung mejangjaba lanur anati motorbike nung arur Rynjah police station nung ano petrol bomb ka pokloksü.

Aji saka tang tashi nung iba lendong ajanga teraksa adokba kecha osang mali.

Ronghona yimtsüing nung railway project site nung yashi tatalokba dak sendakba nung KSU lenir ana Ri-Bhoi police-i pua lir. Police-i pua aliba anaji Khasi Students Union (KSU) North Khasi Hills unit tir, Ferdynald Kharkamni aser KSU Central body organizing secretary, Son Nongkhlaw lir.

## Brahmaputra ayong nung nisung ka asü

**Guwahati, May 28 (Agencies):** Deobarnü Guwahati nung Saraighat apu nungi nisung ka Brahmaputra ayong nung pongoka suseta asü.

Suseta asüsang ya Amingaon, Post Office colony nung alir Rajesh Biswas ta jangjaogo. Pa ya cancer agi shiranga liasü aser khuret makok shisa rama-a jashiba agi suseta asütsü molungtet südi, ta

local temi temolung melemi bilemba metetdaksü.

Saraighat apu ya suseta asüdak tesem ka kümogo aser taoba mapang nunga iba apu nungi pongoka suseta asüba osang aika metetdaksüogo. Taoba küm June ita 19 nüa nisung kati pa kinungtsü aser jala mardol agi akosetba sülen pa Brahmaputra apu nungi pongoka suseta asüba osang angazükogo.

## Mizo nunger kaketshir ana sür lia ngutet

**Guwahati, May 28 (Agencies):** Kanga dang tia maka tatalokba ka nung Assam Down Town University nung azünger kaketshir ana Guwahati yimti kinüklen Panikhaiti tesem nung railway track nung sür lia ngutetogo.

Tasüsang ana ya Mizoram nunger R Lalnalsawma aser C Lalrangma Changa ta

jangjaogo. Tena ya University nungji küm ana Diploma course ka agia liasü.

Police aser local temi ashiba agi, tana ya train agi tsükset südi.

"Tasüsang railway track anasa ngutet. Dena ya train agi tsükset südi," ta idakji alir kati ashi. Iba ken o dak sendakba nung police-i bushisüngdang tenzükogo.

## Totzü pipeline pokdoktsüba tenüing ULFA(I)-i agir

**Guwahati, May 28 (Agencies):** 2017 May 26 nung Dikom oil pipeline pokdoktsüba aser May 27 nung Sonari gas pipeline pokdoktsüba ya United Liberation Front of Asom (ULFA-Independent)-i tenüing agiogo.

Assam ali nungi adokba ali rongsen ajunga India sorkar-i parnok tajangzük angutsü atema

amshiba ajanga iba mapa ya inyak, ta sangdong ka nung metetdaksü.

Gas indang pipeline apokba lendong ya Charaideo district kübok Sonari nung aliba Teokghat tesem nung adalok. Iba pipeline ajanga süngulu ka nem gas agütsü. Iba lendong nung nisung asüba aser taküm samaba osang kicha mali.



Itanagar, May 28, 2017 : 2017 May 22-nü Director of Audit & Pension, Naharlagun nung lendong agütsür telok nungi züngsem pezü Arunachal Police-i apu. Parnok ket nungi AK series rifle ka, hand grenade asem aser injang aika ngutet. Iba ama mapa tamajung inyaker apuba asoshi Chief Minister, Pema Khandu-i police dang pelaba osang ka lemsatetepogo.



# TIR YIMYIM YIMOBILEM (EDITORIAL)

DIMAPUR MONDAY, MAY 29, 2017

## MERA KABO TALI AOTSÜLA !

**N**aga yimten tebilemstü tatembang küma akoktsü asoshi tang India government o NSCN-IM na ken o tejembidak lir aser tanga teloktem odang atadagi. Iba ama mapang ka nung state government-i tatar senden nung ajaki mulunga agizüktettsüsa telemtetba bener arura menden azüngtettsütsü mulunga lir ta lemtetpet lemtettsüba ya nüngdak madoker. Jungjunga bilemdangra, ajaki mulunga agizüktettsüsa telemtetba kati arutetra, iba atemajibo mena aliba menden azüngtettsütsü atema telemtetba agia alitsübaji menügdaker. Nagaland nung aliba Naga nunger tatar yimsüsürtem shisatsü agibo iba telemtetba dang nungi talila mera kata moutetter na (?) ta shisabolua bilemer. Aji oda, ajaki agizüktettsüsa telemtetba bener arunungbo tanurtemia dena pelashishia agizüksü. Ajisüaka, tanübo ajaki agizüktettsüsa telemtetba ka bener arutsü asoshi atali, election ka agili, ano küm pongo süidaktsüli, ano kasa ataa alitsü telemtetba ka agili ta asütsüba mapang masü. Election ka agili India government dang sen meshia bener arua government pezü pongo lema agili ta asüba agi shinga majanzüktsü. Sen agirtemang timtatamba aser magirtemang timtatamba ta Naga nunger telongiang taluba taluba alur. Iba tashidak agi tang asenok ajak kangshidagi. Aji oda, tangbo Nagaland government atema ajaki agizüktettsüsa telemtetba tajung bener arura ta atatsüba mapang masü saka yamai latet nunga koda (?) mesüra yamai latetdi nie (?) ta tebilemba ken o benoka jembitsüba mapang lir ta bilemer. Atangji, Nagaland state government-i Naga yimten tebilemstü koktetsüsa lenmang bushitsü atema 'Committee' kabo shima lir südi. Aji oda, iba committee jagi kechi inyaker aser tatar sendeni kechi koma osang bener arur ta asübjang tongtibangba asütsü. Iba amaji ka mesüra ajaki agizüktettsüsa telemtetba ka aru atatsü atemabo committee shimtsü menügdaker. Tanü Naga nunger ajaki Naga yimten tebilemstü tatembang küma jembitetsü asoshi Naga nunger telok ajak külem ser lenmang bushitsüla ta jembiba angashir. Iba kasaji India government-ia jembir. Iba jagi asenok nem jembitsü shisatsü tilakabo sayur aser jembiba aotsüba lenmang tilakabo lapoktsür amai bilemer. Aji oda, tanü Nagaland tatar senden nung amener tatar yimsüsürtemi anir Naga yimten tebilemstü koktetsüsa inyaksüba rongdak nüngdak kaji, Naga nunger anüdoklen alir o anülulen alirtem na ajurutepa amentsüla. Iba kasaji Naga nunger anüdoklentip alirtem o anüolentip nung alirtem na ajurutepa amentsüla. Kodang item Naga nungertemji ajurua ken o jembiba tenzükdir, iba jagi Naga yimten tebilemstü akoktsü asoshi lenmang bushi tetenzüker asütsü. Iba nung jagi tenzüker Naga nunger anüdok aser anülü, anüdoklentip aser anülulentip alirtem ajak külemi ajurutepa takoktsü lenmang bushitep tenzüktsü. Iba ama senden ayongzüka shisalemsatepba nungiang tebilemstü akoktsüba lenmang ngutettsü. Iba ama senden amentsübaji Nagaland tatar senden nung amenertem rongnungi kar shimteta inyakdaksütsü akok. Aji oda, kodang Naga nunger kinük pezüsülen alirtem ajurutepa takoktsü aser tamakoktsü ken o ajak benoka jembir telatetba ka agitetdir, ibajia ajaki mulungabo magizüktsü akok, saka iba ama telatetbajibo mapa küma benshia otettsü, kechiyong ibaji Naga nunger tanü aser asüng asoshi bilema Naga nunger yimten aser lokti nung lenirtemi latetba asütsü. Joko, alima telongi alur, nübortem tejakleni moutetter aser lanurtem taküm teraksamar ta asüba tia nungi Nagaland kümzüktsü tensa tia akanger asünung, yimsüsürtemi aser nübortemia repranga dangbo malitsüla saka telemtetba agitsü merangba nung shilem agitsüla. Yimten nüchiso jenjang nung masütsü akok mesüra Naga nunger lushia ajak yimten ka kübok melongjemtetsü akok, saka tanü tensa dak apet Naga nunger ajak tenüng nung Nagaland tatar senden nung amenertem anir lokti tentettem ajak dendakja telemtetba ka agitetra, Naga nunger tang aser tarutsü asoshi tagitsüjibo aji dang asütsü.

## OLEMSABANG

Ao

-B.Wati, Chumukedima

AKKOR aser Ao Senden Literature Board-i shitakba sepai tajung ama Ao kaket Ken-o (literature) meima wazüka ayutsü mapa inyaker. Kin kaji saru shitak agütsüba agi masü, oshi (language, dialect) agi sayur. 2018 nungi Govt school-tem nunga Alternative English melen Ao o subject ka ama inoktsü osang ya kanga tang tajung lir; ano menurang apitetba ama angateter.

Ao kaket ken o tera (root) ya American Baptist Missionary-tem lir. Parnoki tentetba Ao o zülu nungi olasü, aser jembiyim api tajungtiba agi yanglushia mezüng lenir tajungtem asür Nokdenlemba, Rev. Dr I. Ben Wati, Chongpongchiten parnoki anir lenir tajungtemi Laishiba Ao oshi nung kanga dang timtema meyipzukba angateter. (Ao Laishiba Jurila Otsu. I. Ben Wati) Iba Laishiba meyip dang English nungja aser tetezü Ao nung bushiteta inoktsü (coin words) merangdang nübor teyongyaba menudaksüba shia lir.

Tsüngrem temeshi O nisung o nung meyipdang nungja tasen, tetezü tasen-tem aser olasü tasen aika renlokba otsü lir. Tanü aseni melamelaa dang Ao azüngba, jembiba aser züluba ya yashi item tangateter ishikati meranga inyakba metsü (seed) lir.

Asüng iba oshi kechi tia aitsü ; tangar oshi samaba ama tejembir melie samatsü ama nibo mapang shia asükjanga meronga shisabulur. State nung Aoer nütsüng timba agi lakh asem nungi pezü tashiag alitsü amai bilemer. Item rongnung iba oshir jembir aser iba oshi nung züngteter kwi alitsü. Jembiba dang masü; iba oshi koma, aser koda jembir item ya-a kanga tongtipang aser nükmen lir. "Taoba putu nungbo Ao oshi liasü; saka tanübo mali." Iba ama tia-ang atongtsu asu ta-a bilemer. Oshi indang shisadangertem bushitetba agi oshi ka samatsü mapang talangkabo magir. Kodang kin nübortem rongnung oshi meimtsu tanüla samadir, iba den külemi parnok oshi samar.

Tanü tensa den medemdang nung iba oshi ya tesamalen odar ama. English agi masü asen yimya aser mapa agiang asen nüngdak ajak bener arur sur-nung asen loktiliba aser kija taküm nung iba ya-ang tongtipangtiba tongshilong ama amshiteper. Bendanglen alir English terara shiteter rogobo ajak meteter ama amanga yimtsüng loktiliba nung mangmangkomangsa bener aruba otsütem lir. Tanü alima nung takar tashitaiter kintemia kin tila tulu kecha mesükshii kin shia panok yimten aser sobaliba temeten aser kin ka temeten noksaji tetsü taso oshi lir ta tangatetba nung English angazükdaksütsü masü, parnok shishilemba oset ajak panok mulungba oshi nung meyipa amshidaksur. Asenokiag aretkoshia amshirdang, parnokbo sen dang ngurbo ojang.

Aika rongnung tatishitsu tila ka, kinungtsu dangi lar medemtsüri 20th March, 2017 anepdang 11:51 nung USA visa angutsü atema sarasadem meshia mobile shiti ka yamai aru. "Among, please need special prayers, tangar countries ajak salary released süogo, saka Indian nungerbo Government-i Nokdangba agi ano release masü. Ano tangya, visa alirtema special permission card charge asür. Only for Indian staffs, because this organisation has shut down in India in March 15, temelaba angutsü prayer süjangma." Ya tanü asen Aoer bendanglen alir sobaliba (culture) lir.

Tanü ano kanga dang nanga aser sapua jembiba bazaar oshi Nagamese ya-a Ao südaktsütsü tashidak ka asütsü. Pei yimtsung loktiliba agi laakadok asü pokyim atemaar, joko bendanglen talisa Dimapur aser Kohima nungang timba nungdener. Pi kin den joko iba yaang tongtepratep o tongtipang kümer sorochiokdak tashi nung yaang sapua jembir. Loktiliba aika nung talisa Police kiyong (police community) amala nungbo yaang parnok official language ama tekülem nunga amshir. Zuluzüra ajak English, saka nagamese dang jembir. Pei tetsü oshi nung asungdangra 'moi sobto nebuji, olob-solob puja-do- puji, holibi koboli nabari, sorry.'

Alima ajunga yimtsung ka ama kümadoker aliba sobaliba agi shirangdaksüba, meimchir kin lokti tuluba tashi agiang amokbangba den asensasa asen oshi meimtsu tanela remsepdaksüba tashidaka lir. Meimchir asoshi kibong den lokti tentet ya kanga dang tongtibang. Koda, koma, kechi jembitsü aser inyaksü, item nungi ajak angazüker. Yimtsüng nung dang masü jila-tem (towns) nunga loktiliba nung mejangraba tanela lir. Private school-tem nung küm shia fee atuba ama dang kilen aser züngsem saru sarur saka nübor tejangraba aser teyongyababo bener marur; aika atema lokti tentet ya telemtet maka kiboksem aruba agi alakba ama bilemer, küm nung lokti senden ken anaben tashiag liteter saka nübortem meima aser jangraa marur.

Oshi kümzüka ayutsü atema sorkari tesayur post agütsüba kisüng agidangbo makoktsüba tesashi waratem asen meketa lir. Yimtsüng dak alaka jila shia nung yimer telongjem, fellowship, Arogo aser tsüraburtem atema teinyaktsu wadang tulu lir. Jila shia nung pei yim saseb kilen kwi lir, kilen shia nung tanur-tila dena Ao jembir, zungteter kwi lir, küm shia züngdangba (census) agia saru aruba nungi Newspaper war expenditures nung masü junga jembir aser zuluteter nemo senpet (award) agütsütsüla ta angateter.

Küm aika dang English o jembir aser zülur saka English nunger makümer. Asen oshi agi asen kechiar sayur. Aseni kodang Ao mejembir, idangji Ao aser iba kin samatsü tenzüker.

**Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir**



## TAMANG AGI TASHIDAK ANEPER

Mrs. MEYISONGLA, Rtd. Deputy Director Nursing, Kohima : Nagaland

Alima nung meimchir ajak ya tamangba yimsü kaka lir . Kari sünglong dak amanger, kari ita anü petinu dak amanga külemer, kari süngyanglu külemer, Muslimi Mohammad dak amanger. Asenoki taküm aliba Tsüngrem dak amanger aji Yisu Khrista.

Tamang ya kechi dang ajar?

Tamang ya asen o nungbo onsara tongmelang tamang ta dang ajatsü südi. Saka English oshi nungbo aika lir.eg. Faith, Trust, Belief, Confidence etc. Tanga yimsü tamang indang masü. Tamang Khristan tamangba indang asenok den tera lemsatepnür.

Tamang tetezü tenük agibo mangur saka Tsüngrem ka lir ta amangba dang ajar. eg. Asenok taküm aliba ya aseni linüba agi alir masü, aseni kanüba agi akar masü saka teyanglur Tsüngrem sentong nung dang alir. Ibajagi tang asenok taküm lir saka minute aser gonda ishika sülen süa adoktsüa memetetba taküm. Iba taküm Tsüngrem indang jembir. 1 Yoh 4:12. Nisung shingaia Tsüngrem kecha südanga munguka, saka asenoki kati ka den meimtepra Tsüngrem asenok dak alir, aser Pa temeim asenok dak alir. Asenoki mopung medeni taküm alitsü makok. Mopungji tei asen den lir, aser iba jagi asenok taküm alir. Saka asenoki mopungbo tenük agi mangur, saka mopung mapabo angur. Yamaji Tsüngrem tenük agi mangur saka Tsüngrem mapabo asenoki angur. Iba dangji tamang ta ajar.

Lai rasaa meteteri ashiba agi tamang indangya tejen lai nungbo anaben dang shia lir ta ashir. Eg.

1. Tazüngkunem 32 :20. Aser pai ashi ni parnok nungi kü jak miimtsü. Parnok tatem kechi kümdir ni reprangdi. Kechiyong parnok kanga tashi manga putu. Tamang makatsüba chirtem lir.

2. Habakok 2:4.

Ajiang pa tanüla asükuma lir, pa meindang, saka temeshipur pei tamang agi alitsü.

Saka tasen lai nungbo tamang indangji aiben dang zülua lir. Noklang pungo (500) ben tashi leplalepshia zülua lir. Ochi tamang indang Yohan 3:16. Kechiyong Tsüngremi alima oda meim nung shirsa pa dak amanger mesahmatsü, saka teti takum akatsü pai pei ajaso chir agütsü.

Yoh 1:1

Tetenzük nung o liasü aser o Tsüngrem den liasü. Aser oji Tsüngrem liasü. Tetenzük dang pa Tsüngrem den liasü (14) aser oji shi aküm (shiji Yisu Khrista). Shibai iba o nung amanger paji chichiba Khristanji lir.

(18) Nisung shingaia Tsüngrem kecha südanga munguka. Saka Tsüngrem ajaso chir shiba tebu teku nung lir pai pa jungkai adoktsüogo. Asen menen yong pa rishikangshia kangkidong asü, saka asemnüpuba nung pa sentsüwangshia shia arur kodaki atu, pa asenok dangi tanaben arutsü iba dakji jijia amangertem dang tamanger Khristan ta ajar.

Yohan 20:29.

Yisui Toma dang ashi. Nai ni angu nung amanger shiri mangu aji saka amangogo parnok tepelatsü.

Yisu Khrista dak taneptsü ain lir. Shirisa pa dak amangdir mesamatsü saka teti taküm angutsü.

Yoh 9:1. Taso dang nungi tenük tapok asoba silom tzütu nung shidoker tenük agi angu. Mangur liasü saka angur ya dang ni metet.

Tenyar mapa 3:6. Saka peteri ashi ni taribi aser hon maka, saka ni kechi aka aji nü nem agütsüdi. Nazaret nung Yisu Khrista tenüng nung na jaja. Aser pai pa teka nung tachichi agi amer atsümeso aser idangyongji pa tetsüng aser tenüklangret tashi ita aküm. Aser pa pungmesoa nokdak aser jajameso jaja pungtena Tsüngrem tenüng asang.

Tamang agi tashidak aneper ta Malcolm Meconnelli ashi. Mrs. Rose Baxter tebuba ajongbena stroke sür asü. Iba asü pila sentep agidang la rüjeb ma nung ajutoker alanga teperem ret kudanger hospital nung among. La yaritsü doctor Harold Koenig arudang lai "good morning doctor, nai ni atema kechi inyaksü" ta asüngdangba agi doctorbaji kanga pela. Doctori la kanga shisabulur ta meteta, "nai item timtem kudasür aremer ta asüngdang." Idangji lai yamai ashi "kü Tsüngremi kodanga ni azünga medoktsür, kinünger aser tembartem malidaka Yisuiji kü tembar tajungtiba lir. Ni teti kü Bible azünger aser pa den sensakasemer aser kü molung anisungzüker" ta ashiba angashia doctorba molungjang nung kanga kongshi. Pa ya professor of psychiatry, America Duke university school of medical department nung inyaker liasü.

Tamang agi tashidak aneper ta ashiba mamangi liasü. Iba sülen pai scientific study asütsü tenzü. Kuli aika ajanga tamang agi shirang aneper ta pai 1984 küm paper nung sangdong. Pai yamai ashi tamang agi sarasademdang tashidakji azüoker (Control) aser Tsüngremi shirangeri mepishiba angashir aser shirangbaji aneptsür ta ashi. Tantsür tambur 455 kusa tashidak aketertem tendang. Sentepi aortem anügo 3-4 nung shirang aneper, shirbok sentepi maor parnok anügo 12-14 tashi agiakang aneper ta putet.

Doctortem aikati tamang agi tashidak aneper ta asüba nung mamangi liasü. Saka tangbo doctortem aikai tamang akar. Heart case 58 surgical operation agi. Tsüngrem dak tamang akar parnok 38 taneptsü angu. Saka doctor dak dang tamang akartembo taneptsü mangui asü. Mapa medenra tamangji tasü. Tsüngremi pa melen doctor tashidak putettsü agütsü aser nurse temi aneplua yari. Parnoki ashiba angatsüla.

Mark 9:23.

Nai kokra ta ! Shibai amanger pa asoshi ajak takoktsü.

Israel nung küm 16 tsüngda research aoba shiranger 3900 tendang. Parnok ajak tashidak kasa, cancer aser temolungjang ashidak aketertem dang liasü. Tamang agi mozü shidak achirtem tashidak ajung. Shirnoki tamang makai mozü achi parnokbo asü .(60% ajung).

Yale university nung tantsür tambur 2812 dak research agi, Tsüngrem dak tamang akar mesüi arishia alir. Tamang makartembo stroke süa asür ta putet. Dr Herbert Benson professori ashiba doctor teyari nungdakartemji temolungjang ashidak aketertem, high blood pressure aketertem, tanur mabenertem aser amoi junga maortem teemba lir ta ashi. Itemibo tamang agi sarasadem nung ajungtsüpurtem dang liasü. Parnok atema mozü tajungtipaji tepela aser tamangji lir.

(Maneni taruba adok nung)

## ANOGO ABEN TSÜNGREM DEN

### TSÜNGREM TASHI AIN

"Kechiaser Tsüngrem nungi O kecha mataloki alitsü makok"  
- Luk 1:37

Tsüngrem tashi ain indang asen meimchiri kodanga rajemtsü makok. Tsüngremi Pa tashi ain ajanga tesüngmangtsü mapatem inyakba Laishiba nung koba zülua lir iba ajanga asenoki tila ka asüyonga angatettsü akoker.

Mezüngbuba Tsüngrem tashi ainjungkai adokbaji asenoki Pai alima aser idakji aliba kechisarena ajak yangluba angur. Alima nung aliba shisakar ajunga meyoktepera meja (ant) tila ka sting yanglutettsü makok. Saka Tsüngremi alima rangpen telungtet (universe) Pa tashi ain kija agi poktetdaksü aser item ajakji sota ayur. Iba ain tashiji koda tesüngmangtsü. Ibr 1:3 nung Tsüngremi Pa O ain agi taküm ajak lidaktsü" aser sota ayur ta shia angur, koba tetezü Tsüngremi alima rangpen telungtet aser idakji aliba ajakji Pa ain kija agi dang tashi agütsür. Tsüngremi inyaksüba ajak agi, Pai kechi mulunger aji jembitsü, aser ozüng agütsütsü aser Pa tashi ain agi Pai jembizüka yokba ajak atalokdaksür. Atangji, koba aseni asen shisatsü agi rajemtsü makoker, Tsüngrem tashi agi dang akoktsü, teimla sayutettsü.

SARASADEM:

Atangji nung Tsüngrem ain tashiji tatem maka, tematiba tashi ain, aser Tsüngremji ajak takoksang Tsüngrem lir. Amen

## Rex Tillerson-i Ramadan sentong agütsü memulunger

Washington, May 27 (Agencies): State Department nung Islam nung Ramadan benjung tenüng nung sentong ka agütsü asüngdangba Secretary of State Rex Tillerson-i magizük, ta US ketdangsertemi ashi.

1999 küm nungi Republican aser Democratic secretary of state temi Eid al-Fitr benjung tembangba tenüng iftar dinner ka-sa ayongzüka agiyonga arur. Ajisüaka, taküm State Department indang Office of Religion and Global Affairs-i iba sentong agütsü asüngdangba Tillerson-i magizük.

April 6 nü züluba shidi ja nung Office of Religion and Global Affairs-i Tillerson dang Eid al-Fitr sentong ka agütsü asüngdang.

Pai iba temepishiba magizükba ajanga takümbo State Department-i Ramadan benjung ayongzüka agütsü tebilemba kecha mali ta sayur.

Honibar nungi linük aika nung Muslim nungertemi lumia sarasademba ita tenzüko.

Osangbenertemi iba dak sendakba osang asüngdangdang,

State Department otongdar kati, "Onoki Eid al-Fitr amungtsü atema lenmang bushitepdar. US indang mission balala nung US ambassador tem danga Ramadan amungtsü atema onoki teti ajungmesor" ta ashi.

Muslim nungur teimba sür aliba linüktem nungi nisungtem United States-i maitdaksüba sülen Muslim activist temi President Donald Trump'er sorkari Islam sempar ta aitsür.

Ajisüaka, Trump'er sorkari ashiba agi parnoki Islamist kiralongratem anemer saka Islam denbo mangatettep kecha mali.

"Taküm Tillerson-i State Department nung Ramadan benjung ayongzüka magidaksüra, iba jagi US sorkari Muslim nungur den tesentaktep meyunür ta kuli sayutsü," tat a US ambassador Farah Pandith-i metetdaksü.

Pandith-i Bush aser Obama sorkartem mapang mapa inyak aser lai White House o State Department nung Ramadan sentongtem ayongzüka agiba nunga yaritep.

## US kübok Neosho yimtii kangki agientsü memulunger

Neosho, May 28 (Agencies): Missouri nung ketdangsertemi tsüngrem dak mamanger telok kati kangki agientsü takhangba agütsüba magizük.

Tan ita tetenzüklen Wisconsin nung amenoka aliba Freedom From Religion Foundation (FFRF)-i Neosho yimti nung mayor dang Big Spring Park nung kangki ka yanglua aliba agienang ta takhangba agüja ken o ka benok.

U.S. Constitution alema iba kangki ayur kechiyong iba kangki yimjak nung ayuba ajanga sorkari Christianity pusemer ta asüba sayur, ta FFRF-i züluba shidi nung shia liasü.

"Sorkar ali nung Latin kangki ka teti atema ayubaji ozüngi memelar. Iba ya ajanga sorkar Khristan yimsü pusema nungiter ta asüba sayur. Iba ya Establishment Clause anema lir" ta parnokisa ashi.

Ajisüaka, Neosho nung alirtemi FFRF-i kangki agientsü

merangba indang osang angazükba sülen parnoki ketdangsertem dang takhangba agütsüri aginüba ama mapa meinyaksü ayongzük.

Iba kangki ya 1930 nung yanglur aser iba atema ken o kecha madoki dang arur, ta parnoki ashir.

"Kü dangi 'Tasü ittang. Kangki yuang' ta züluba text aser email tem arur aser iba amaji onokia inyaksü" ta Mayor Ben Baker-i osangbener dang ashi.

City council züngsemtemia ibaji mulunga agizük aser park nung kangki ayutsü atema vote agitepba nung parnoki mulunga agütsü.

"Eighth Circuit case law ajanga iba kangki ayutsü melar. Anungji, Neosho yimti nung alirtemajaki iba kangki magientsü mesüra ozü yimti indang putisotsü nung mekongshitsü atema telemtetba agir" ta council-i sangdong ka nung metetdaksü.

OLONG PAITEP # 4434

Grid for OLONG PAITEP # 4434 with numbers 1-22 in various positions.

TIPILEN

- 5. Ajunga - (4)
6. Tebur dang yamai ajar - (6)
8. ngshi - (4)
10. Tsungkum ozu ka - (3)
11. Aika / Perir anung - (6)
13. Sungjang tako ka - (5)
15. Mechinui akum - (6)
17. Odaktsu - (3)
19. Agutsuba memeshi - (4)
21. Tesutep / Apet - (6)
22. Tetsur tenbenjem mapang - (4)

LANGTSUNGLN

- 1. Teyira - (5)
2. A gsang - (3)
3. Arua mali / Matong - (4)
4. Tema tereprangtsu - (4)
7. Onsara / Alia - (4)
8. Tulu masu - (4)
9. Yimya-yimpong - (5)
12. Ak alidak - (4)
14. Yangi masu - (4)
16. Kaket shilem ka - (5)
18. Ayak aketba shiruru - (4)
19. Meru - (4)
20. Kidongren telemsa - (3)


OLONG PAITEP # 4433 TELANGZUBA

TIPILEN :

- 1. Min, 2. Sungkum, 6. Sempa, 7. Somomo, 8. Sura, 9. Tasazuk.
10. Aren, 12. Alemlu, 13. Aiben, 14. Suremsu, 15. Tim

LANGTSUNGLN :

- 1. Metsu, 3. Kumzük, 4. Moa, 5. Dokan, 8. Sunem, 9. Tembar, 11. Kilem, 13. Ans.



Alokba-er kibong nung alir ajunga addicted

Shin-er : Ohoi...adianu ner kidangi kipoksem arur ako...lir sudi...??? Ni ya councillor ner arogoi kibong ajunga dangi kipoksem yokba ako....

Alokba : Ayyyyyaaaaa..... arung nii... councillor sura oda ozu kibong atema Tsungremi kechisa sayur'ar kecha mimshia meyui indang-indanga dang shiangma no....

Shin-er : Ni sarasademdi no.... aaaaaayyyyaana ner kibong ya tesungmangtsu aannii... Kinungbu o kinungtsu nati anir kibong nung alir ajunga addicted....addicted...

Tebu alcohol addicted...Tetsu T.V. serial addicted... Jabaso tambusang Drugs addicted....Jabaso tanubusang Internet, facebook & Whatsap addicted..... Jala talakla Video game addicted.... ano Minila Mobile phone addicted...waa...waa...

Alokba : Hau nii...shidak ako...aji shidak dang ako....ajisuka ajak ya kinungtsu tai ajaa...

Tetsu : Hai azu-ak-sang...kechi kodaser ku nem dang tai tongloksur.... na yi ajembaji ni khangshia jemdaktsur asu koda ??? sssaaaallaaa... na kumdangang noo....

Shin-er : Ayyeee...nena ojang dang raratepang.... nenok kibong nung senotsu timyimi ketdangtsu mashiba ajanga iba timtem ya adoker ajaa.... tang nungi danga melenshiangma.....

Lilir : L. Kika Pongener, Aoyimkum, Dimapur.

TANUBO NAI LANGZUANG

Q: India Tatong Tir Mohammad Hamid Ansari koba ita pa kumsuk atemtsu?

(Taruba adok nung onoki langzutsu)

YASHI ADOK TELANGZUBA :Maharashtra

Happy Birthday

TENUNG : Moalong Lemtur

Tasoba : May 29

Kum : 4

Talidak : Landmark Colony, Dimapur.

Tsungremi Jabaso arishi maneni moajang ta sarasademtsur.

-Temeim Kinungertem.



NAIA YA METETER MA

Drake-i Guinness World Records otsu yanglu



Rap kentener Drake-i Guinness World Records otsu tasen ka yanglutetogo aser ibaji pai taoba hopta Billboard Music Awards nung nominations 22 nungi sempet 13 ngutetba ajanga lir.

Canada nunger Drake-i kum ka nung kentener kati 'Most Billboard Music Awards' ngutetba otsu tasen yanglu. 2012 kum Adele-i sempet 12 ngutetba iba otsu yanglua liasü saka Drake-i la ajatetogo.

Drake-i anguba sempettem rongnung Top Male Artist, Top Billboard 200 Artist, Top Streaming Artist aser Top Rap Tour dena lir.

Ajisuka, pai takum ajak dang tematiba sempet angubaji 'Top Artist award' liasü aser iba sempet ya pa nem Michael Jackson'er jabaso tambusang Prince Jackson-i agutsu.

Billboard Music Awards sentongji Las Vegas, Nevada, USA nung aliba T-Mobile Arena nung ayongzuka agi.

Kentener Taylor Swift-i Billboard Music Awards 21 tashi ngutetba lir aser Drake-i la meneptsu ama ajiteter.

SUDOKU # 3547

Sudoku grid for # 3547 with numbers 1-9.

TELANGZUBA # 3546

Sudoku grid for # 3546 with numbers 1-9.

OJANG LUTEP # 4042

- OBADURN : [ ] [ ] [ ] [ ] [ ] [ ] [ ] [ ] [ ]
NTEMSUGR : [ ] [ ] [ ] [ ] [ ] [ ] [ ] [ ] [ ]
KMAULEB : [ ] [ ] [ ] [ ] [ ] [ ] [ ] [ ] [ ]
JIAK : [ ] [ ] [ ] [ ] [ ] [ ] [ ] [ ] [ ]
AAGBOIDNG : [ ] [ ] [ ] [ ] [ ] [ ] [ ] [ ] [ ]
KUTETEMT : [ ] [ ] [ ] [ ] [ ] [ ] [ ] [ ] [ ]
ATNGUSUM : [ ] [ ] [ ] [ ] [ ] [ ] [ ] [ ] [ ]
KTAKO : [ ] [ ] [ ] [ ] [ ] [ ] [ ] [ ] [ ]
NKMBIKUAG : [ ] [ ] [ ] [ ] [ ] [ ] [ ] [ ] [ ]
MTSNGUATO : [ ] [ ] [ ] [ ] [ ] [ ] [ ] [ ] [ ]

OJANG LUTEP TELANGZUBA # 4041

SUNGJANG TAJUNG JENTI ATANGBA SUNGDONGBO NISUNGI LONG AGI KANGA ONSATSUR



Anü ita petinu ajanga alima nung tsüngsang mopung melenshidaktsüba ama nisunger tia-a melenshidaktsür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



**Aries**  
21/3-19/4

Nü nükjidong tongtettsü merandang nai medemer kar amadoker alitsü akok. Talang nung aliba kinunger aser medemer kar den tanü nai jembang.



**Taurus**  
20/4-20/5

Tanü nai kinunger aser medemertem den kazüa senzütsü merangang. Südok sünema medemertem den mapang indoka kazütsü anogo tajung lir.



**Gemini**  
21/5-20/6

Talang nung aliba kinungertem den tanü nai jembitsü mapang tajung lir. Nai jangraba mapa tem parnok den lemsateptsü junger asütsü.



**Cancer**  
21/6-22/7

Inyakyim kar nung nai tanü na azükotsü merangang. Aser nai yangluba sentong nung masü saka tangar-i yangluba sentong nung nai anidakang.



**Leo**  
23/7-22/8

Kinunger tsüngda nung nai tokteptsü memerangtsüla. Mapa kar nung nai tangar den toktepdang timtem-i maitsüsa inyaksüla.



**Virgo**  
23/8-22/9

Medemertem den ajurutepa kazütsü sentong kar yangluang. Nai shisa ka-a inyakang aser tangari nü dak sempet tajung ajitettsü.



**Libra**  
23/9-22/10

Tanü nai kinunger tsüngda timtem kar angatetteptsü merangang saka tangar kibong tenung mamshitsüla. Lokti aser kibong yimya balala ta nai metettsüla.



**Scorpio**  
23/10-21/11

Nai tanü tangar den o kanga mejembi tajungba asütsü aser kinunger nungi mezüngmeshi o kar nai angashitsü akok.



**Sagittarius**  
22/11-21/12

Tanü nai mapa kera-a temer medemer mesüra kinungertem den mapang indoktsü merangang. Saka nü nem lezmüksüba mapa junga inyaksüla.



**Capricorn**  
22/12-19/1

Tanü nai kinunger den anisüngzüka kazütsü merangang. Yimden yimsüsüba aser shishilembaba maparen nung ama nai nür kinungertem indang mebilemstsüla.



**Aquarius**  
20/1-18/2


Rara adokba mapang nai shiba den rara menar aji metetang. Nai lokti asoshi tali jembira nür kibong nung mangatettep adoktsü südi.



**Pisces**  
19/2-20/3

Tia tamajung nung aliba medemer mesüra kinunger den nai tanü mapang indokang aser iba ajanga nai parnok temolung süngzüksütsü.

## Sachin taküm otsü film ajanga sayar mezüng anogo nung sen crore 8 aazük



**Mumbai, May 28 (Agencies):** Sachin taküm otsü film 'A Billion Dreams' sayar mezüng anogo nung sen crore 8.40 aago, ta film yanglurtemi metetdaksü. Iba film ya Hokolbarnü Hindi, Marathi, Tamil, Telugu aser English nung sayaa liasü. "Sachin: A Billion Dreams film ajanga sayar mezüng anogo nung sen crore 8.40 aazüka 'docu-drama' jenjang

nung otsü tasen ka yangluogo," ta film yanglur tenüng nung agütsüba osang ka ajanga metetdaksü.

Trade analyst Taran Adarsh-i ashiba agi, iba amala film tem jenjang nung tetenzükba anogo nung sen paika aaba ya kanga tajung.

Iba film ajanga tereprangertem nem Tendulkar taküm otsü aser pa professional asayar ka ama

tejangshibatem sayur. Maneni iba flm ajanga nüburtemi Sachin taküm indang memeteti aliba aika jangjaa sayur.


Tweeter nung tenüngsang balala aruba nung Sachin-i yamai telangzüba agütsü; "Kü atemabo iba film ajanga kechi sayur aji tongtibangba. Onoki takokba tashi inyakogo aser nenoki kanga junga agizüktetba atema kanga pelar."

## Ni Hollywood nung shilem aginür: Radhika Apte

**New Delhi, May 28 (Agencies):** Radhika Apte-i ashiba agi, lai Hollywood mesüra British film industry nung dang masü saka alima cinema nung shilem aginür aser aji la pungmang lir.

"Ni Hollywood nung shilem aginür. Nü pungmang ajak agi alima cinema nung shilem agitsübaji lir, aser khenübo iba nung shilem agitsü asoshi maongka angutsü imlar," ta Radhika-i ashi.

Radhika 2005 küm sayaba film 'Vaah! Life Ho Toh Aisi!' nungi film tem nung shilem agi tenzük aser iba sülen lai Shor in the City, Kabali, Phobia, Badlapur, Manjhi - The Mountain Man aser short film Ahalya nunger nung shilem agiba ajanga la ajaki jangajaa



meteta aküm.

La ya Pune nungi lir aser tang la kinungbo Benedict Taylor den London nung alir. "Ni commercial film Badlapur, Hunterrr, Manjhi - The Mountain Man, aser tang Padman nung shilem agiogo.

Commercial aser non-commercial film tsüngda tebandang tera lir. Linük nung tetsürtem asoshi shilem agitsü atema jenjang tajungba kümdar aser kü nema film tajung kar nung shilem agitsü asoshi maongka agütsütsü imlar," ta laisa ashi.

La taruba film Padman nung shilem agiba angutsü. Iba film otsü ya tebur kati ajaki alitetsüsa 'sanitary napkins' yanglutsü asoshi asameyangba, shidakba tatalokba otsü ka nung ajemdaker yangluba film ka lir.

Film yanglur R. Balki-i 'Padman' ajanga Arunachalam Muruganantham otsü ashitsü asoshi shimtet. Iba film nung Akshay Kumar, Sonam Kapoor aser Radhika nungeri tongti shilem agir.



Austria, May 28: Bad Aussee tesem nung daffodil benjungmong mapang "Daffodil Princess", tem sobaliba süoshi semer parade nung shilem agiba noksa nung angur.


## TAN HOPTA ATEMA - KOMA SÜLA ?

Q Central government-i Nagaland nung nashi maleptsü aser shibelen mesüdaktsütsü asoshi army nem tashi agütsü nunga koma süla ?

Olong 20 shi nung June 02, 2017 tashi nung iba telangzüba ya onok dangi

e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Hokolbar nü adoktsütsü.

## Arishi kum 69 nung Gregg Allman süogo



**Savannah, May 28**

**(Agencies):** Allman Brothers Band tenzüksang Gregg Allman par kidang Savannah, Georgia nung 2017, May 27 anogo nung süogo.

"Gregg par kidang Savannah, Georgia nung sunep-sunepa amozüka ogo... Pa tashidak aikati tonger kum isheka shiranga liasü," ta pa indang official website nung

zülutsü.

"Pa shiranga aliba mapang nunga pa adianu aser kising-i pa subur nem ken tenja liasü aser aji pa asoshi mozü tajungtiba liasü. Ken atenba ajanga pa takum temabai ajungket aser mapang tamajung nunga pa ken atenba ajanga tali tasü itshia aru," ta zülüja lir.

'Midnight Rider', 'Whipping Post' aser 'All My Friends' ken

atensang ya aria bilemba aser taochi aketba takum ka liasü, ta pa indang medemer aser manager, Michael Lehman-i ashi.

"Par kibong aser kentener telok nung züngsem dang meimba ya balaka liasü aser yamaji pa saburtema meima liasü. Gregg ya medemer tajung ka liasü. Onok ajaki pa monungratsü," ta Lehman-i zülutsü.

Allman Brothers Band nung pa züngsem liasü saka tenu Duane ya 1971 kum November ita motorcycle nung tsükseta asüba sülen pa iba telok doktsür kija ken tena liasü. Iba sülen pai Allman Brothers Band ya tanaben yanglushi aser Beacon Theatre nung 1989 nungi 2014 kum tashi ken tena aru.

Gregg aser taoba mapang pa kinungtsü Cher, tena jabaso Elijah Blue den külemi pa mezüng chir Devon, Layla, Delilah aser Michael nungertem lir.

## India nung Isuzu-i Pick-up tasen yanglutsü



**New Delhi, May 28**

**(Agencies):** India nung automobile shishilembadaki tesülen aiter, Isuzu Motors India ajanga linük nung pick-up gari tasen yanglutsü nükjitung lir.

"Segment tasen ka tenzüksü asoshi onok India-i aru. Japan linük alema orr ISUZU-i yangluba gari rongnung iba pick-up ya kanga tongtipang lir. Nija amshitsü aser shishilembaba maparen nung amshitsü asoshi

India nung pick-up gari tasen yanglutsü nükjitung lir," ta 'mu-X' SUV sayatsüba mapang ISUZU Motors India indang deputy managing director, Hitoshi Kono-i ashi. Tang tashi bo iba gari ya Thailand nung dang yanglur aser tanga linük temi bener oa ayoker, ta pai-sa shisem.

"Tang bo iba plant ya Andhra Pradesh nung aliba Sri City nung amenloka lir, anungji iba

plant nungi SUV dak alaka nija atema V-Cross, shishilembaba nung amshitsü asoshi S-Cab aser Regular Cab yanglutsü," ta Hitoshi Kono-i ashi.

Taoba fiscal nung ISUZU company ajanga V-Cross unit 2000 aser S-Cab o Regular Cab ya unit 1000 yoka liasü.

"Tang fiscal nung item gari ya shilem 15 agi timba ayoktsü imlar," ta pai shisem.

Kum ka nung unit 50,000 yanglutsü sentong nung India nung item gari ya 2016 April nungi yanglu tenzük aser nüburtemi meshiba dak ajemdaker kum ka nung unit lakh 1.2 yanglutetsü.

Andhra Pradesh nung iba plant ya sen crore 3000 agi amenlok aser iba company ajanga yangluba gari ya SAARC linüktem, Middle East aser Africa linük temi bener oa ayoktsü sentong lir, ta ISUZU company ajanga sangdong.

## Padmavati film yangludang Ranveer Singh yiru



**Mumbai, May 28**

**(Agencies):** Padmavati film yangludang Ranveer Singh tekolak yiru, ta osang ka ajanga ashi. Pa yiruba anepaluba sülen maneni film yangluba nung shilem agi, ta kasa osang ajanga shisem.

"Ranveer film yangluba mapang nung tekolak yiru saka pa indang shilem nung kanga temolung agüja inyakba ajanga yiruba memeteti inyaka liasü.

Pa tekolak yiruba nungi azü aludang ang film yangluba anen. Shinga-ia pa azü ayimtsüsa yirur alitsü ta mebelem. Tekolak zübu anepaluba sülen pa film yangluba tesem anasa mozüki ka bushia anir ao. Treatment tembangba sülen pa meneni film yangluba tesemi arua pa shilem tangok. Pa yiruba ajanga mapa thitema meyui pai anogo tenyaksü mapa tembanga inyak. Pa tekolak yiruba artsü nungdaka liasü," ta osang ajangasa shisem.


Iba film nung pa Alauddin Khilji shilem agiba angutsü. Maneni pa den külemi Sanjay Leela Bhansali-i direct asüba film nung ya Deepika Padukone aser Shahid Kapoor natia tongti shilem agir.

## Dangal film-i Baahubali 2 ajatetogo

**May 28, 2017 (Agencies):**

Aamir Khan-i tongti shilem agiba Dangal film ya India nung film tem rongnung sen timtiba aaba film kumogo; parnoki Baahubali: The Conclusion film dang nungi timba aaogo. Netish Tiwari direct asüba film yagi tang tashi nung alima ajunga nungi sen crore 1,743 aazükogo aser Baahubali 2 film-i tang tashi nung aazüker aliba sen crore 1,530 ajatetogo. Dangal film yagi China nung sen timteba aazük. Iba film ya China nung May 5-nü sayaa liasü, aser sen crore 810 aazüka India nung film tem rongnungi China nung sen timtiba ajangzükba film kumogo.

Dangal film nung ya India nung nungtugutiba film actor Aamir Khan-i tongti shilem agir, aser iba film indang China ajunga nung kanga bolua jembidar. Social media sapang, Wechat aser Weibo nung amala nung iba film indang tanen makai jembidar.



Ajita süaka Baahubali 2 ya 2017 kum India nung sen timtiba aazükba film lir. Iba film ya oshi 4 nung sayaa liasü aser sayaba anogo nü sen crore 121 aazük. Baahubali: The Conclusion film nung Prabhas, Anushka Shetty, Rana Daggubati aser Tamannaah nungeri tongti shilema agir aser India ajunga nung Hindi, Tamil, Telugu, aser Malayalam oshitem nung India nung film sayaba tesem 6,500 dak tali nung sayaa liasü. Maneni iba film ya alima ajunga nung film sayudak 9,000 dak tali nung sayaa liasü.

## Singapore nung Apple indang mezüngbuba Southeast Asia store lapokogo

**Singapore, May 28**

**(Agencies):** Southeast Asia nung mezüngbuba Apple indang store Singapore nung lapokogo aser iba store semdangi nisung aika arur. Iba store ya Orchard Road nung lir aser iba store ya alima nung Apple indang store nungtugutiba asütsü, ta ashir.

Iba store nung mezüngbuba floor nung iPhone aser MacBook nung yua lir aser temaba floor nung ya classroom ama lir aser iba dakdang nung iPhone customer nem phone indang tesayuba balala agütsür.

Iba store lapokdang mezüngbuba nokdaka alisang ya China nung Macau nung inyaker arishi kum 25 tain, Xiang Jiaxin liasü. Jiaxin ya iba store lapoktsü ghonda 12 jelia arua nokdak aser pa ya iba

store lapokba den mapang indangtepa Singapore nung südoksünema amongtsü aru. "Iba store lapokba nung dentetsüsa maangka anguba asoshi ni kanga pelar. Macau, Guangzhou aser Nanjing nung Apple indang store laopkdanga ni oa aden," ta pai osangbener dang ashi.

Apple company nung sen billion \$256.8 lir aser taoba kum iba company tenzük kum 40 ajungba benjungmong mongogo.

Alima ajunga nung Apple indang store 500-shi lapoka lir aser anogoshia item store semdang-i nisung million ka dak tali arur. Singapore dak alaka Asia nung Apple indang store ya Hong Kong, China aser Japan nung lapoka lir.

Taoba kum Singapore semdang nisung million 16.4 liasü.



Guizhou, May 27: Southwest China nung aliba Guizhou Province kübok Guiyang tesem nung 2017, May 27 anogo China International Big Data Industry Expo 2017 sentong aliba mapang nüburtemi robot ka den sensaksemba noksa nung angur. Iba sentong nung telok 310 dak temai yanglutetba oset 1,000 dak tali nüburtem dang sayua liasü.





Srinagar (Jammu & Kashmir), May 28, 2017: Srinagar nung curfew ozüng benoka aliba police station tenet kübok Nowhatta, Rainawari, Khanyar, M.R. Gunj, Safa Kadal, Kralkhud and Maisuma tesemtem nung security sepaitemi yimti lenmang nung senzürtemi mita repringba noksa nung angur. Honibarnü security sepaitemi Hizbul Mujhideen commander, Sabzar Bhat den par züngsemtem khasetba sülen Seperatist temi Kashmir kübok tongti jilatem nung Deobar nungi tenzuka anogo ananü longkak aittsü sangdonga lir. Sabzar Ahmad Bhat tasü mang tanü South Kashmir kübok Tral yimdak remogo, aser pa asüpila sentong nung nisung noklang aika adenshia liasü. Yaküm security sepaitemi Hizbul Mujahideen commander, Burhan Wani tepsetba sülen Sabzar commander akum.

## Tanü nungi tenzuka Ato kilonser Modi-i linük 4 semdangtsü

**New Delhi, May 28**

**(Agencies):** Deobarnü Ato kilonser, Narendra Modi-i, asüng nungi tenzuka pai linük pezü- Germany, Spain, Russia aser France semdangtsü, aser ibaji India nunger rongsenkettsüng ajungkettsütsü nükjidong nung aser item linüktem dang India nung sen invest asütsü asüngdangtsü nükjidong nung lir, ta metetdaksü.

Pai anogo trok agia linük pezü semdangtsü. Pai Germany tama semdanga Chancellor, Angela Merkel den India-Germany Intergovernmental Consultations (IGC) framework kübok onüktem jembitsü.

Paisa Germany Tir, Frank-Walter Steinmeier-a ajurua senden amentsü.

Modi-i ashiba agi, Merkel tenati shishilembaba aser investment, security aser kiralongra anema raraba, science & technology, skill development, yimitem nung terenlok, railways aser civil aviation, clean energy, terenlok, anema alibaren aser alternative medicine nung linük ana amalitepa inyaksü atema jembitsü.

Germany ya partner tajung ka lir, ta shia Modi-i, "India melenshitsu atema kü nükjidongji Germany den tapet asütsü," ta ashi.

Germany yimtiba, Berlin nung Modi aser Merkel nati linük anaprong nungi business lenirtem den senden mena shishilembaba aser investment nung linük ana tesendaktep tashi itshitsü atema jembitsü.

Iba sülen Mongolbarnü Modi-i Spain semdangtsü, aser ibaji küm 30 shi nung tang mezüng India Ato kilonser kati iba linük semdang asütsü.

Pai Spain nung King Felipe VI ajurutsü aser Tir, Mariano Rajoy den senden mena ken o balala jembitsü.

"Linük ana tesendaktep tajungba akumtsü atema onoki o lemteptsü," ta Modi-i ashi.

Paisa, "Onoki Spain nunger industry nem India nunger project balala- infrastructure, smart cities, digital economy, renewable energy, defence aser tourism nung shilem agia invest südaksüner," ta ashi.

Iba sülen May 31 nü Modi Russia-i oa St. Petersburg nung June 2 nü tashi 18buba India-Russia Annual Summit nung adentsü.

"Yaküm October ita Goa nung senden (India-Russia senden) amendang lemtebatem maneni inyaksü atema ni Tir Putin (Russia) den o lemteptsü," ta paisa ashi.

Modi aser Putin natasa linük anaprong nungi CEO tem dena

shisa lemsateptsü.

June 2 nü Modi aser Putin nati St. Petersburg International Economic Forum (SPIEF) nunga o jembitsü.

Tatamsa Modi-i June 2 aser 3 nü France semdangtsü, aser tang tasen shimba France Tir, Emmanuel Macron den senden amentsü.

"France ya asenok atema kanga tongtibang Strategic Partner ka lir. Ni Tir, Macron ajurua linük anapronglai jangraba onüktem nung jembitsü yongyaa atar," ta Modi-i ashi.

"Ni France Tir den UN Security Council reforms aser India-i UN Security Council nung permanent züngsem akumtsü benokba, multilateral export control regimes balala nung India züngsem akumtsü, kiralongra anema amalitepa raraba, alima tsüngsang-mopung melenshiba aser International Solar Alliance densema alima onüktem nung o lemteptsü," ta Ato kilonserisa metetdaksü.

India nunger atema investment partner jenjang 9buba nung France linük lir aser India'er defence, space, nuclear, renewable energy, urban development aser railways nung France ya kanga tongtibang partner ka lir.

## J&K nung Angh yimsüsüba benoktsüla: Farooq

**Srinagar, May 28**

**(Agencies):** Tanü taoba Chief Minister, Farooq Abdullah-i, linük nung tamangba loktitem tsüngda rara adoka aliba azüoktsü atema Jammu & Kashmir nung tekaratiba Angh yimsüsüba benoktsüla, ta ashi.

Srinagar nungi tang tasen shimba MP, Farooq-i, "Onoki kodanga Angh yimsüsüba pusema maru, saka onoki ibaji anema aruogo. Ajisüaka tanga lenmang mali," ta ashi.

Tawa Ato kilonser, Narendra Modi-i National Conference tongti lenir, Farooq New Delhi-i jaoka Kashmir onük nung o lemtepa liasü, aser tanü pai, ita aika state tensa mesüngjemeti aruba ya Modi-i yimjung lenmang agi dang temdaksüner,

ta ashi.

"Ato kilonser den ni lemtepa onüktemji ni lemsatsü makok. Ni ashitsü ajak agi, pai state tensa atema tebilemstü katsür aser iba ya tembangdaksüner. Yimjung lenmang agi dang tembangdaksüner," ta Farooq-i ashi.

J&K Chief Minister, Mehbooba Mufti'er sorkari South Kashmir nung dang masü saka Kashmir rangben nung tamakok nguogo, ta paisa aitsü.

"Item tatalokbatem ajanga linük nung tanüngba tesemtem nunga tamangba lokti tsüngda rara adokdaksür. Anungji tekaratiba nung iba tebilemstü atema inyaksüla," ta paisa shisem.



Mirzapur (Uttar Pradesh, May 28, 2017: Deobarnü Uttar Pradesh nung CBSE-i class 12 pur tatidang osang sangdongba sülen Mirzapur yimti nung tatidang nung takok angur kaketshir tebur telok ka pelatepba noksa nung angur.

## Nashi tepsettsü nokdangba ya Sangh Parivar asalentong lir: CPI

**Thiruvananthapuram, May 28**

**(Agencies):** Tanü CPI-i, Centre-i nashi tepsetba nokdangtsü atema metetdaksüba ya Sangh Parivar-i India linük ya 'Hindu linük' ka kümdaksütsü atema merangba shilem ka lir, ta aitsü.

Kerala yimtiba, Thiruvananthapuram nung osangbenertem den jembidang CPI General Secretary, S Sudhakar Reddy-i, "Sangh Parivar-i ajak nem kangshia süngolemba dang chidaksütsü meranger. Iba ya parnok indang 'Hindu linük' asalentong shilem ka lir," ta metetdaksü.

Iba ya shisa makaba telemteba ka lir aser party-i ibaji aitsür, ta shia Reddy-i, iba telemteba anema longkak aittsü atema May 31, 2017 nü CPI secretariat nung o lemteptsü, ta metetdaksü.

"Sangh Parivar-i sempaba telok kar- Muslims aser Dalit nunger anema Centre sorkari iba telemteba agi," ta paisa aitsü.

Parivar-i lokti ya BJP tangatetba nung anidakdaksütsü meranger, ta shia pai, nüburtemi kechi azüngtsüla, kechi sobutsüla, kechi jembitsüla aser kechi achitsüla? Ibaji RSS headquarters nung telemteba agir, ta ashi.

Nüburtemi iba ya magizüktettsüla, anungji item anema meyiper nokdaksüla, ta paisa ashi.

India linük nung nütsüng shilem aikati kisetshiruru tepseta achir, aser Kerala nunga nütsüng shilem 90 shii shi achir; Tanga state kar nung nütsüng shilem 60-70-i shi achir, ta Reddy-i metetdaksü.

Sorkari iba telemteba agiba ajanga tanga linüktem dangi shi yokba nung timtem adokba dang masü saka rongsenkettsüng- mamatzü aser shiküp industry tema kongshitsü, koba ajanga aluyimertem timtemtsü, ta pai ashi.

Asen Ato kilonser, Modi-i aniba küm asem sorkar ya takoksatsü ka liasü, ta shia pai, "Asen exports, manufacturing aser mining sector tem timtem tulu nung lir," ta ashi.

Linük kübok Kerala, Karnataka, Tamil Nadu, Andhra Pradesh aser Telangana state tem nung tzünglu junga maruba ajanga aluyimertem timtemer, ajisüaka sorkari nüburtem nem teyari kecha magütsü, ta paisa ashi.

Modi yimsüsüba kübok Centre-State tesendaktep mejungi kümogo, ta paisa shisem.




New Delhi, May 28, 2017: Swatantryaveer Vinayak Damodar Savarkar asoba anogomung nung, Deobarnü New Delhi, Parliament House nung Lok Sabha Speaker, Sumitra Mahajan, Minister of State for Agriculture & Farmers Welfare and Parliamentary Affairs, S.S. Ahluwalia, BJP lenir tain, LK Advani aser tangartemi asür nem akhüm agütsüba noksa nung angur.



May 27, 2017 nü Nay Pyi Taw, Myanmar nung Myanmar indang 21st Century Century Panglong Peace Conference nung nisungtem Union Peace Dialogue Joint Committee (UPDJC) senden nung adenba noksa nung angur. Anogo pungunü mungdang ya Deobarnü tembangsüba liasü saka anogo ka atsülanger agitsü lemtet. Union Peace Dialogue Joint Committee (UPDJC) nung agizükba onüktemji shisadanga sülen union agreement nung benoktsü.

### UK Police-i Manchester bomb pokdaksüsang noksa sayu Britain nung jihadi nisung 23,000 lir



**Manchester/London, May 28 (Agencies):** Manchester yimti nung Ariana Grande kenten sentong nung suicide bomber Salman Abedi indang noksa police-i yimjak nung sayuogo.

May 22, 2017 aonung nisung 22 tepsetba nisung indang noksaji 'security camera' nung tangokba lir.

Bushisüngdangertemisa arishi küm 22 tain Abedi lendong agütsütsü asoshi inyakba maparen kar tsüingsü

ngutetba osang metetdaksü. British intelligence-ia metetdaksü.

CCTV footage nungi agizükba noksa nung Abedi-i nükrangtsü ka khaloker lir aser pai waistcoat ka asemba nung telunglen backpack indang straps ajiteter.

"Tesüiba anogo pungu tsüingda onoki Abedi, pa den yaritepertem, pa nem senotsü teyari agütsürtem, pai semdangba tesemtem aser bomb yangluba indang osang tejangja kar bushitetogo" ta British Police-isa metetdaksü.

Ano külen, Deobarnü British intelligence-i linük nung jihadi nisungtem 23,000 tashi jangjatetogo aser parnoki kiralongra mapa inyaksü akok ta metetdaksü.

May 22 nü Manchester Arena nung bomb pokdaksüba lendong paitoktettsüba liasü ta nisungtemi police aser security services aitsüba mapang ka nung iba osang metetdaksüogo.

Pop kentener Ariana Grande indang kenten sentong nung nisung 22 asü aser 59 yiru.

Jihadi tem ta ajiteta aliba nisung 23,000 nungi parnok 3,000 dak lendong keta lir, ta

British intelligence-ia metetdaksü.

Parnok nisung 3,000 ji police aser intelligence services-i bushisüngdang mesüra mita reprangdang.

Britain nung taküm kiralongraba mapa inyakertem- Manchester bomb pokdaksür Salman Abedi aser Westminster amaker Khalid Masood na ya taoba mapang ketdangsertemi mita liasü saka parnoki toktsür lia lendongtem atalok, ta British intelligence-isa metetdaksü.

Honibarnü Prime Minister Theresa May-i Britain nung kiralongra lendongji "critical" nungi "severe" ta jenjang ajemtsüogo, saka lai ashiba agi Hombar tashi sepaitem yimdong nung mapa lemzüksütsü.

Britain nung police tanishisangi ashiba agi, nisung 11 puogo aser ano maneni aputsü.

"Abedi dak sendakba kiralongraba telok sasep nung nisungtem puogo. Onoki kanga meranga bushisüngdang südar. Onoki tesem 17 nung maneni mita odar" ta London Metropolitan Police Assistant Commissioner Mark Rowley-ia ashi.

### Hillary Clinton anema benokba ken o magizüker

**Washington, May 28 (Agencies):** Libya kübok Benghazi nung aliba U.S. diplomatic compound nung America nunger ana tepsetba tsüraburtemi Hillary Clinton anema ken o ka benok saka ibaji federal judge kati magizük.

Taoba Secretary of State Hillary-i parnok tenüng memenüksü ta shia tetendangeri iba ken o magizük.

Hillary-i la indang nija email server amshiba ajanga Sean Smith aser Tyrone Woods na tepset, ta tsüraburtemi ken o benokba nung shia lir.

Nija email server amshiba ajanga kiralongrartemi miim osangtem metet aser iba jagi parnoki jabasotem asü, ta tsüraburtemi ashi.

"Ken o benoker jabasotem anojungi asüba atema kanga jashir aser sasar aser tasür kibongtemi takoksa angubaji okadakia haut a agizüker. Ajsüsüaka, Hillary Clinton-i la indang nija server amshidang, official süa mamshi aser taoba mapang tasür kibongtemi lai parnok tenüng menüksü ta ken o benoka mali" ta Washington nung U.S. District Judge Amy Berman Jackson-i ashi.



May 28, 2017 nü Philippines kübok Marawi City nung sepaitem kiralongrartem den khatepdang agiba noksa ka angur. Deobarnü Armed Forces of the Philippines (AFP)-i ashiba agi Marawi yimti nung raradang kiralongrar 61 tepset aser civilian 124 tashi kümzük.

### Ramadan mezüng anogo nung nisung 18 pokset

**Khost, May 27 (Agencies):** Muslim nunger lumiba ita Ramadan tenzükba anogo nung Afghanistan kübok Khost yimti nung suicide car bomber kati nisung 18 tepset.

Iba tatalokba atema telok shingaiia tenüng agia mesangdong aser ketdangsertemi ashiba agi Khost province nung America nunger sepaitem den külemi inyaker Afghan security forces dak tenük yoka bomb ji pokdaksü.

"Khost province nung nisung kati gari nung bener arua pokdaksü aser iba lendong nung nisung 18 tepset aser trok yirutsü. Tasürtem rongnung tanur ana dena liasü" ta interior

ministry otongdar Najib Danish-i metetdaksü.

"Bomb ji public bus station ka dak tenük yoka pokdaksü aser tasürtemji civilian süoshi sübortem dang liasü saka tang tashi nung onoki parnok maitsütem mejangteter" ta paisa ashi.

Külen, provincial police tanishir Faizullah Ghairat-i ashiba agi, tasürtem rongnung civilian tem aser Khost Provincial Force (KPF) züngsemtem liasü.

Anogo 14 tejakdang Taliban telungpurtemi Kandahar nung Afghan sepaitem tesep ka amakdang, sepa 15 jungnüa tepsetba sülen tanü bomb lendong atalokogo.



May 28, 2017 nü North Korea nung Korean Central News Agency (KCNA) ajanga sayuba noksa nung North Korea lennir Kim Jong Un-i Academy of National Defence Science ajanga anti-aircraft guided weapon system ka tendangba mapang reprangba noksa nung angur.

### Sri Lanka nung nisung 151 süogo; 111 mangu bushir

**Colombo, May 28 (Agencies):** Sri Lanka nung tzümetsüng aser anentsüh lendongtem atalok. Lendongji Galle district lendong balala nung tasür ajak agi 151 jungogo, ta Deobarnü ketdangsertemi metetdaksü.

Iba lendong nung nisung 111 samar bushitepdar aser million ka dak tema timtem nung lir, ta Disaster Management Centre-i ashi.

Iba lendong atema Sri Lanka-i alima dang nnungi teyari meshiogo.

Sri Lanka kübok district 25

nungi 14 tashi nung tzümetsüng aser anentsüh lendongtem atalok. Lendongji Galle district nung tuluba atalok aser iba district nung nisung 128,047 (kibong 32,215) timtemer, ta parnokisa ashi.

Galle, Hambantota, Kalutara aser Matara district tem nung Tri-Forces aser Police tem mapa lemzüksüogo.

June ita tetenzüklen tashi Sri Lanka nung tzünglu tulu arutsü aser yipru süitsü ta asadangteta lir.



# Lung agi ona rara anenba sülen ang olemtep tenzüksü: Amit Shah

**New Delhi, May 28 (Agencies):** Lung agi ona raraba inyakyim anenba sülen ang Kashmir tebilemtepi indang olemtepji tenzüksü ta BJP president Amit Shah-i ashi.

Taoba NDA sorkari Hurriyat den olemtep aliba ama, tang aliba Centre sorkaria inyaksü asü koda ta osangbeneri asüngdangdang, "Ozüng alema mapa inyaksangshiba anenba sülen ang olemtep tenzükteter. Onoki ajak den jembitsü" ta pai langzü.

BJP aser PDP nati Jammu &

## Dr. Jitendra Singh-i... (Tapak 1 nungi...)

Dilli Haat nung showroom-cum-restaurant ji tetenzüker dang aser DoNER Ministry-i iba sentong ya Delhi NCR ajungalen aser Mumbai, Chennai o Bangalore nunga inyaksü, ta paisa ashi.

Dilli Haat nung North East Organic Showroom-cum-Restaurant nung North East state 8 nungi tsünütetbatem sayatsü aser ayoktsü. NER nung chiyungtsü tajung adokba ajungkettsü aser linük nung sensotemi temang anema alitsü asoshi chiyungtsü tajung achitsü tangatetba agütsüsi atema iba sentong ayonga agir.

Kashmir nung sorkar mekümtetdang tamasa telok ana tsüingda Agenda of Alliance agitepba nung state nung sendaktepa alir ajak den olemtep agitsü indang lateta lir. "Lung agi ona rara anenba sülen ang onoki olemtep tenzüksü. Lung agi aon tashi, olemtep malitsü. Parnoki lung agi onra, onoki parnok nem nara magütsütettsü. Parnoki ibaji angatettsüla" ta Shah-isa metetdaksü. State sorkari mapa inyakba nung tenük asünger asü koda ta osangbeneri BJP president dang asüngdangdang, sorkari infrastructure renloksü atema mapa tajung inyaka aruogo aser yimtsüng tia nung aliba tesemtem nung renlokdaktsüogo, ta paisa shisem.

### TENÜNGSANG AGÜTSÜR

Longsa senso Wb. Imliyanger Jamir (S/o Late Imtimeren Jamir, Ex. Minister), pa dak temulung lemteta aser maongka tulu agüja Ao Senden Tir shimba asoshi Mokochung Town Longsa Senso Telungjem (MTLST)-i tenüngsang agütsür. Ne akhüm kübok Ao kin tipdema aser yimjiyimjung nung anitsü asen sensosanger ajaki sarasadema atar.

Sd/-  
K.Imtituba Pongen  
President, MTLST

Sd/-  
Sashimeren Jamir  
Secretary, MTLST

**V.J'S COACHING CENTRE**  
D.C. COURT ROAD, DUNCAN, DIMAPUR (ESTD. 2000)

**ADMISSION GOING ON**

⇒ Offer Extensive Coaching for the Repeaters of  
**Class-X / XII-Arts / XII-Com / XII-Sci. for  
Improvement & Repeaters**

⇒ Hostel attached for both Boys & Girls (Separately)

**Contact : 03862-248394 / 248464 / 9436600530**

## PELABA LEMSATEPER

"A Testimony of God's Grace Defying Human Possibilities..."  
**Late. Mr. L. Mar Ozüküm (Mongsenyimti)**  
5th Mile, Dimapur



**ASO :**  
06/03/1948


**ASÜ :**  
17/05/2017

Onoki kanga dang meimba obala aser kinungbo asüba mapang ozü asoshi aria bilemtepi aser temeim sayur kija ajak dang 'kanga pelar' ta temulung taroktiba nungi metetdaksür. Medemerterem aser kibongtemi ozü den sarasadem, nübo, osetsüset aser senotsü agi yaritepba atema kangasa pelar. Nenoki ozü den asüku lemsatepba pelashishia agizüker aser ozüi nür mapa tajung kodanga mamatsü.


Tsünglanglen tetshia alirtem dang ozüi pelaba shisemer.

1. East Dimapur Ao Baptist Arogo
2. Unity Village Ao Baptist Arogo
3. Aoyimti Baptist Arogo
4. Sumi Baptist Church Unity Village
5. Chakhesang Baptist Church Unity Village
6. International Evangelistic Fellowship (IEF), Dimapur Wing
7. Dimapur Mongsenyimti Senso Telongjem
8. Dimapur Langpangkong Senso Telongjem
9. Dimapur Aoli Ozüküm Telongjem
10. Unity Village Council
11. Unity Village Ao SensoTelongjem
12. Tsükjemtemsu Zünga Telongjem
13. D.Khel Telongjem Mongsenyimti
14. Medemer Telongjem Mongsenyimti
15. Mongsenyimti Nokojungba Tsür Dimapur Unit
16. Sentep Luim Society Dimapur
17. Sacred Heart English School, 5th Mile
18. Vision Home Higher Secondary School, Diphupar

-Temeim Kinungtsü, Jabaso, Jalatem aser Semchirtem.



**Narendra Modi**  
Prime Minister



Government of India

**North Eastern Council**  
Ministry of Development of North Eastern Region

**66<sup>th</sup>**

**PLENARY**

**Monday, 29<sup>th</sup> May, 2017**

Pravasi Bhartiya Kendra, Dr. Rizal Marg, Chanakyapuri, New Delhi

**Dr. Jitendra Singh**  
Chairman, North Eastern Council

Minister of State for Development of North Eastern Region (Independent Charge), Minister of State for Prime Minister Office, Personnel, Public Grievances & Pensions, Department of Atomic Energy and Department of Space, Government of India

**Members**

**Padmanabha Balakrishna Acharya** - Governor, Arunachal Pradesh & Nagaland

**Banwarilal Purohit** - Governor, Assam & Meghalaya

**Dr. Najma Heptulla** - Governor, Manipur

**Lt. Gen. Nirbhay Sharma, PVSM, UYSM, AVSM, VSM (Retd.)** - Governor, Mizoram

**Shriniwas Dadasaheb Patil** - Governor, Sikkim

**Tathagata Roy** - Governor, Tripura

**C.K. Das IAS (Retd.)** - Member

**Pema Khandu** - Chief Minister, Arunachal Pradesh

**Sarbananda Sonowal** - Chief Minister, Assam

**Nongthombam Biren Singh** - Chief Minister, Manipur

**Dr. Mukul Sangma** - Chief Minister, Meghalaya

**Lal Thanhawla** - Chief Minister, Mizoram

**Dr. Shurhozelie Liezietsu** - Chief Minister, Nagaland

**Pawan Chamling** - Chief Minister, Sikkim

**Manik Sarkar** - Chief Minister, Tripura

**NORTH EASTERN COUNCIL**  
Government of India, Nongrim Hills, Shillong, Meghalaya  
Website: [www.necouncil.gov.in](http://www.necouncil.gov.in)

ASSAM | ARUNACHAL PRADESH | MANIPUR | MEGHALAYA | MIZORAM | NAGALAND | SIKKIM | TRIPURA

## CBSE Class 12... (Tapak 1 nungi...)



"Takok tajung anguba anguba atema kaketshirtem ajak nem mamangteter. Ni tatidang tenügang agütsür. Takok nung junga züluogo ta mengutetertem danga ano meteta dang liasü saka meranga zügang ta ni yamai tematiba jenjang takok angutsübo meimla" ta ashi.

"Iba ya ajanga Humanities azüngertemi Mezüngbuba jenjang mark tajung menguteter ta asüba tangatetba agientsür" aser lai osangbener den ta Raksha-isa metetdaksü sensaksemdang, "Ni kanga aser lai Political Science pelar aser takok tulu (Hons) züngnür ta shisem.

## Chiyungba yimya... (Tapak 1 nungi...)

Centre telemtepba ka tashi tepoukdak ayutsü anema yashi Congress aser mesüra senchi 5,000 achitsü, Left party-i state tesem mesüra temerenshi ajaklen 'Beef fest' ya anaprong agütsüsi lateta lir. ayongzüka liasü.

"Yuva Morcha-i benokba Yashi tatalokba anema nung ajemdaker Kerala Mongolbarnü Kerala nung NDA-i longkak aittsü lemtego.

120 A nung ajemdaker ken Iba tatalokba dak o ka benokogo," ta Kannur sendakba nung Congress-i, SP, Siva Vikram-i ozüng alema aibelener osangbener dang ashi. shinga pu-masemtsü, ta

Iba section kübok, lokti shiogo, ajisüaka Youth nung nisung kar Congress züngsem, Rijil-ibo, jashidaktsütsüsa yimjak nung pai inyakba mapa atema pai shiruru tepsetba atema küm kecha mesasar, ta ashi.

## Sudirman Cup South Korea-i kokogo



**Gold Coast, May 28 (Agencies):** Deobarnü South Korea puri küm 14 lir tang mezüngbuba Sudirman Cup kokogo. Australia, Gold Coast nung parnok i ba asayamong ter ben tashi koker aliba telok China 3-2 agi akok.

Iba tetoktepba tatembang buba asaya tarep temeyoktep asaya nung Choi Sol-Gyu aser Chae Yoo-Jung nati China nung asayartem madak 21-17, 21-13 agi koka South Korea-i iba marok pezüben buba benogo.

South Korea puri Sudirman Cup ya 1991 aser 1993 nung koka lir.

Choi aser Chae na ya alima nung jenjang 14buba nung lir aser denati kanga junga asayatetba ajanga tanabuba jenjang nung aliba China nung tarep asayar Lu Kai aser Huang Yaqiong madak takok angu.

Rio Olympic champion Fu Haifeng aser Zhang Nan nati tebur tarep asaya minute 42 agi koka Korea nung tarep asayar madak 21-14, 21-15 aki takok

ngua parnok telok temaba jenjang nung toktsü.

Iba sülen tetsür kicha asaya nung World bronze medalist Sung Ji-Hyun-i 21-12, 21-16 agi He Bingjiao madak takok ngua score kasa aküm.

Tasembuba asaya nung Olympic champion, anaben tashi World champion aser All England champion Chen Long-i tebur kicha asaya nung minute 47 agi Jeon Hyeok-Jin 21-10, 21-10 agi ayong ayonga akok. Iba takok ajanga score 2-1 kuma China nung temaba jenjang nung toktsü.

Ajisaka tetsür tarep asaya nung Chang Ye-Na aser Lee So-Hee nati 21-19, 21-13 agi Chen Qingchen aser Jia Yifan na koka deciding asayatsüsa aküm koba Korea nung temeyoktep tarep asayari koka liasü.

## Sarita aser Pinki tanaben amateur boxing-i arutsü

**New Delhi, May 28 (Agencies):** Professional jenjang nung ita trok mejungi lir taoba world champion, L Sarita Devi aser Commonwealth Games nung bronze angur, Pinki Jangra-nati tatok meshia amateur boxing-i tanaben meyiba arutsü.

Indian Boxing Council (IBC) den tezüngzüktep agir alila tsüngteper ana ya Boxing Federation of India (BFI) nem taidok meshia shidi zülua agütsür national camp nung tanaben oa adentsü.

"Pinki ya asüng nungi camp nung adentsü, saka Sarita ya nija mapa kar inyakba sülen yakda arutsü. Denaprong-i tatok meshiogo. Sarita professional akümdang onoki latettsüba temzüng nung mejaja aser Pinki-i temelaba magie camp doktsü," ta BFI ketdangser kati osangbener dang ashi.

Arishi küm 31 tain, Sarita-i professional bout nung January 29-nü mezüng tsüngtepba sülen khen-a tsüngtepa mali aser la ya tang Mumbai nung tetsü temang majung aliba ajanga tetsü den lir. La anogo ishika lir national camp nung adentsü.

Iba maparen ya IBC tir, Brig. (Retd) P K Muralidharan Rajai-ia jangjatsüogo.



L Sarita Devi



Pinki Jangra

"Denaprong-i federation nem osang magütsüba asoshi tatok meshiogo. Tangbo parnok tsüngteptsü asoshi sendong kicha mali, anungji dena ya national camp-i aoba tajungba asütsü," ta Raja-i ashi.

International Boxing Association (AIBA) temzüng tasenba ajanga professional boxer tem Olympics nung shilem agitsü menokdang saka parnok shimtetsü asoshi pei linük nung aliba federation ajanga shimtsü temelaba agüja lir.

## French Open nungi Kerber tsükogo

**Paris, May 28 (Agencies):** World No. 1, Angelique Kerber asoshi otsü tamajung ka yangluteta Deobarnü French Open asayaba nung Ekaterina Makarova-i 6-2, 6-2 agi tsükdaktsüogo.

1968 nungi tenzüka French Open nung temaba jenjang nung alir ka mezüng round nung tsüker ya Germany tsür, Kerber mezüng alitsü.

Arishi küm 29 tain, Kerber ya taküm kanga junga masayateti arudagi. La ya Madrid Open nung yiruba ajanga asaya tom nungi

anentsüsa aküm aser Rome Masters nunga Anna Kontaveit-i tsükdakja liasü.

Taoba küm December ita kotari agi atsüngba sülen French Open nung mezüng asayaba nung Czech Republic tsür, Petra Kvitova tanabuba round-i iogo. Wimbledon marok anaben bona alila, Kvitova-i America tsür, Julia Boserup madak 6-3, 6-2 agi takok angu.

2012 küm French Open semi-final tongtetla, Kvitova-i tanabuba round nung Bethanie Mattek-Sands mesüra Evgeniya Rodi na den asayatsü.

## Dortmund-i Frankfrut madak takok ngua German Cup kokogo

**Berlin, May 28 (Agencies):** Honibarnü German Cup final asaya tanabuba shilem nung Pierre-Emerick Aubameyang-i penalty ka idakja Borussia Dortmund-i 2-1 agi Eintracht Frankfurt madak takok nguogo. Iba asaya ya Aubameyang atema Dortmund nungi tatembangbuba asaya asütsü akok.

Penalty ajanga Aubameyang-i goal agütsüba ya pa asoshi iba season nung goal 40buba liasü. Pai Dortmund nungi season 4 asayaba nung goal 120 agütsü.

Aubameyang Dortmund nungi 2020 tashi asyatsü asoshi contract lir. Pa Paris St-Germain, AC Milan aser China's China's Tianjin Quanjian club temi alitsü asoshi jangraba metetdaksüogo. Aji saka pai ashiba agi, Dortmund coach den jembiteperang

telemtetba agitsü.

Final asaya tenzüker minute 8buba nung Ousmane Dembele-i goal ka agüja Dortmund pur temaba jenjang nung toktsü. Ajisaka minute 29buba nung Rebic-i Frankfurt pur atema goal ka agüja score 1-1 aküm. Iba sülen Frankfurt puri goal agütsütsü asoshi maangka aika angu saka parnoki goal magütsütet.

Asaya shilem tanabuba nung Dortmund captain Marcel Schmelzer aser playmaker Marco Reus naprongla yiruba ajanga masaya.

Minute 67 buba nung Frankfurt goalkeeper Lukas Hradecky-i Christian Pulisic alangdaksüba ajanga penalty ka mena, koba Aubameyang-i ayong ayonga idakja parnoki German Cup final akok.

## Arsenal-i FA Cup tenet ben buba abener



**May 28, 2017 (Agencies):** Honibarnü FA Cup final asaya nung Aaron Ramsey-i minute 79buba nung tanabuba goal agütsüba ajanga Arsenal puri 2-1 agi English Premier League champion Chelsea madak takok nguogo. Iba takok ajanga Arsene Wenger-i anir Arsenal puri FA Cup 7 ben buba akoker asütsü.

Taküm küm asaya nung Arsenal pur Champions League nunga masayatetsüsa akümba ajanga fan temi Wenger kanga mejungi aitsü. Küm 20 tsüngda nung tang ya mezüngbuba parnok Champions League nung

masayatsü. Aji saka Wenger lenisüba kübok season tatembang i ba marok abenba ajanga Aston Villa coach George Ramsey ajateta 'FA Cup greatest manager' kümogo.

Asaya nung Arsenal pur atema mezüngbuba goal Alexis Sanchez-i minute 4buba nung agütsü. Iba sülen asaya tanabuba shilem nung Diego Costa-i Chelsea pur atema minute 68buba nung goal ka

agüja score 1-1 aküm saka mapang tatsüka dang lir Ramsey-i minute 76buba nung Arsenal pur atema tanabuba goal agüja par teloki iba asaya akok.

Iba takok ya Arsenal pur atema season 4 nung asemen buba takok asütsü aser ajak meyokteper parnoki iba Cup 13 ben tashi koka lir. Maneni iba takok ajanga parnok Manchester United pur jaddang kümogo.

### BILEMDANGANG

"Metetba ji teperi masü, amshitsüla; ashiba ji teperi masü, inyaktsüla."